



গীতাঞ্জলি

রবীন্দ্রনাথ ঠাকুর



বিশ্বভারতী গ্রন্থালয়

২ বঙ্কিমচন্দ্র চট্টোপাধ্যায় স্ট্রীট । কলিকাতা

প্রকাশ ১৩১৭

...

পুনর্মুদ্রণ ১৩২০

...

পুনর্মুদ্রণ ১৩২৬, ১৩২৮, ১৩২৯, ১৩৩০, ১৩৬২

বিখ্যাত ভারতী সংস্করণ ১৩৩৪

পুনর্মুদ্রণ ১৩৩৭, ১৩৪৩, ১৩৪৬

নূতন সংস্করণ ২৫ বৈশাখ ১৩৪৯

পুনর্মুদ্রণ চৈত্র ১৩৪৯, কার্তিক ১৩৫০, আশ্বিন ১৩৫১

আষাঢ় ১৩৫২, ফাল্গুন ১৩৫৫, জ্যৈষ্ঠ ১৩৫৮, বৈশাখ ১৩৬১

বৈশাখ ১৩৬৩

বিজ্ঞাপন

এই গ্রন্থের প্রথম কয়েকটি গান পূর্বে অন্য দুই-একটি পুস্তকে প্রকাশিত হইয়াছে। কিন্তু অল্প সময়ের ব্যবধানে যে-সমস্ত গান পরে পরে রচিত হইয়াছে তাহাদের পরস্পরের মধ্যে একটি ভাবের ঐক্য থাকা সম্ভবপর মনে করিয়া, তাহাদের সকলগুলিই এই পুস্তকে একত্রে বাহির করা হইল।

শাস্তিনিকেতন। বোলপুর

৩১ শ্রাবণ ১৩১৭

শ্রীরবীন্দ্রনাথ ঠাকুর

সূচীপত্র

সূচীপত্রের গানের প্রথম ছত্রের উল্লেখের সঙ্গে সঙ্গে, ছেদচিহ্নের পর, প্রচলিত
স্বরলিপি-গ্রন্থের নির্দেশ দেওয়া গেল। স্বর—স্বরবিতান
পরবর্তী অঙ্ক উক্ত গ্রন্থমালার ষণ্ড-সূচক

অস্তর মম বিকশিত করো। স্বর ২৪	৬
অমন আড়াল দিয়ে লুকিয়ে গেলে। স্বর ৩৭	২৭
আকাশতলে উঠল ফুটে	৫৬
আছে আমার হৃদয় আছে ভরে	১২৬
আজ ধানের খেতে রৌদ্রছায়ায়। শেফালি	৯
আজ বরষার রূপ হেরি মানবের মাঝে	১১২
আজ বারি ঝরে ঝর ঝর। কেতকী	৩২
আজি গন্ধবিধুর সমীরণে। স্বর ৩৮	৬৫
আজি ঝড়ের রাতে তোমার অভিসার। কেতকী	২৪
আজি বসন্ত জাগ্রত ঘারে। স্বর ৩৮	৬৬
আজি শ্রাবণঘনগহনমোহে। কেতকী	২২
আনন্দেরই সাগর থেকে। শেফালি	১০
আবার এরা ঘিরেছে মোর মন। স্বর ৩৭	৩৯
আবার এসেছে আঘাত আকাশ ছেয়ে। কেতকী	১১১
আমরা বেঁধেছি কাশের গুচ্ছ, আমরা। শেফালি	১২
আমার এ গান ছেড়েছে তার	১৪৪
আমার এ প্রেম নয় তো ভীক	১০১
আমার একলা ঘরের আড়াল ভেঙে	২৬
আমার খেলা ষখন ছিল তোমার সনে। স্বর ৩৭	৮০
আমার চিত্ত তোমায় নিত্য হবে	১৫৬
আমার নয়ন-ভুলানো এলে। শেফালি	১৫
আমার নামটা দিয়ে ঢেকে রাখি ঘারে	১৬২
আমার মাঝে তোমার লীলা হবে	১৪৯
আমার মাথা নত করে দাও হে তোমার। স্বর ২৩	১

আমার মিলন লাগি তুমি । স্বর ৩৭	৪০
আমারে যদি জাগালে আজি, নাথ । কেতকী	২৮
আমি চেয়ে আছি তোমাদের সবাপানে	১১৬
আমি বহু বাসনায় প্রাণপণে চাই । স্বর ২৪	৩ ৷
আমি হেথায় থাকি শুধু । স্বর ৩৮	৩৭
আর আমায় আমি নিজের শিরে	১১৭
আর নাই রে বেলা, নামল ছায়া । স্বর ৩৮	৩১
আরো আঘাত সহবে আমার । স্বর ৩৭	১০২
আলোর আলোকময় ক'রে হে । স্বর ৩৮	৫৩
আঘাতসঙ্ক্যা ঘনিয়ে এল । স্বর ৩৭	২৩
আমনতলের মাটির 'পরে লুটিয়ে রব । স্বর ৩৭	৫৪
উড়িয়ে ধ্বজা অভভেদী রথে । স্বর ৩৭	১৩৬
এই করেছ ভালো, নিষ্ঠুর । স্বর ৩৮	১০৩
এই জ্যোৎস্নারাতে জাগে আমার প্রাণ	২৪
এই তো তোমার প্রেম, ওগো । স্বর ৩৮	৩৬
এই মলিন বস্ত্র ছাড়তে হবে । স্বর ৩৭	৪২
এই মোর সাধ যেন এ জীবনমাঝে	১১৪
একটি একটি করে তোমার	৭৫
একটি নমস্কারে, প্রভু । স্বর ৩৮	১৬৮
একলা আমি বাহির হলেম	১১৫
একা আমি কিরব না আর	২৭
এবার নীরব করে দাও হে তোমার । স্বর ৩৭	৭০
এসো হে এসো, সজল ঘন । কেতকী	৪১
ঐ রে তরী দিল খুলে । স্বর ৩৭	৮১
ওগো আমার এই জীবনের	১৩২
ওগো মৌন, না যদি কও	৮৩
ওরে মাঝি, ওরে আমার । স্বর ৩৮	১৫২
কত অজানারে জানাইলে তুমি । স্বর ২৬	৪

কথা ছিল এক-তরীতে কেবল তুমি আমি	২৫
কবে আমি বাহির হলেম । স্বর ৩৭	৭৬
কে বলে সব ফেলে যাবি	১২৮
কোথায় আলো, কোথায় ওরে আলো । কেতকী ও স্বর ৩৭	২০
কোন্ আলোতে প্রাণের প্রদীপ । স্বর ৩৮	৬২
গর্ব করে নিই নে ও নাম, জান অন্তর্ধামী	১২৭
গান গাওয়ালে আমায় তুমি	১৭৫
গান দিয়ে যে তোমায় খুঁজি	১৫১
গাবার মতো হয় নি কোনো গান	১৪৮
গায়ে আমার পুলক লাগে । স্বর ৩৮	৫০
চাই গো আমি তোমারে চাই	১০০
চিত্ত আমার হারালো আজ । স্বর ১৩	৮২
চির জনমের বেদনা	৮৯
ছাড়িস নে, ধরে থাক এঁটে	১২৫
ছিন্ন করে লও হে মোরে	৯৯
জগৎ জুড়ে উদার সুরে । স্বর ৩৭	১৮
জগতে আনন্দযজ্ঞে আমার নিমন্ত্রণ । স্বর ৩৭	৫২
জড়িয়ে আছে বাধা, ছাড়িয়ে যেতে চাই । স্বর ৩৭	১৬৪
জড়িয়ে গেছে সরু মোটা	১৪৭
জননী, তোমার করুণ চরণখানি । স্বর ২৬	১৭
জানি জানি কোন্ আদিকাল হতে । স্বর ৩৮	২৫
জীবন যখন শুকায়ে যায় । স্বর ৩৮	৬৯
জীবনে যত পূজা । স্বর ৩৮	১৬৭
জীবনে যা চিরদিন	১৬৯
ডাকো ডাকো ডাকো আমারে	১০৭
তব সিংহাসনের আসন হতে । স্বর ৩৭	৬৭
তাই তোমার আনন্দ আমার 'পর । স্বর ৩৭	১৪০
তারা তোমার নামে বাটের মাঝে	৯৩

তারা দিনের বেলা এসেছিল	২২
তুমি আমার আপন, তুমি আছ আমার কাছে	৬৩
তুমি এবার আমায় লহো হে নাথ, লহো । স্বর ৩৮	৬৮
তুমি কেমন করে গান কর যে, গুণী । স্বর ৩৮	২৬
তুমি নব নব রূপে এসো প্রাণে । স্বর ২৬	৮
তুমি যখন গান গাহিতে বল	২০
তুমি যে কাজ করছ, আমায়	১০৫
তোমায় আমার প্রভু করে রাখি	১৫৭
তোমায় খোঁজা শেষ হবে না মোর	১৫২
তোমার দয়া যদি	১৬৫
তোমার প্রেম যে বহিতে পারি	৭৭
তোমার সাথে নিত্য বিরোধ	১৭১
তোমার সোনার খালয় সাজাব আজ । শেফালি	১১
তোরা শুনিস নি কি শুনিস নি তার । স্বর ৩৮	৭৩
দয়া ক'রে ইচ্ছা ক'রে আপনি ছোটো হয়ে	১৩১
দয়া দিয়ে হবে গো মোর । স্বর ৩৭	৮৭
দাঁও হে আমার ভয় ভেঙে দাঁও । স্বর ৩৮	৩৮
দিবস যদি সাজ হ'ল, না যদি গাহে পাখি	১৭৮
দুঃস্বপন কোথা হতে এসে	১৫০
দেবতা জেনে দূরে রই দাঁড়িয়ে । স্বর ৩৭	১০৪
ধনে জনে আছি জড়িয়ে হায় । স্বর ৩৭	৩৫
ধায় যেন মোর সকল ভালোবাসা । স্বর ৩৭	২১
নদীপারের এই আঁধারের । কেতকী	১২২
নামটা যেদিন ঘুচাবে, নাথ	১৬৩
নামাও নামাও আমায় তোমার	৬৪
নিন্দা দুঃখে অপমানে	১৪৫
নিভৃত প্রাণের দেবতা । স্বর ৩৮	৬১
নিশার স্বপন ছুটল রে এই । স্বর ৩৮	৪৪

পারবি না কি যোগ দিতে এই ছন্দে রে । স্বর ৩৮	৪২
প্রভু, আজি তোমার দক্ষিণ হাত । স্বর ৩৭	৫১
প্রভু, তোমা লাগি আঁধি জাগে । স্বর ৩৮	৩৩
প্রভুগৃহ হতে আসিলে যেদিন	১৪২
প্রেমে প্রাণে গানে গঞ্জে । স্বর ২৬	৭
প্রেমের দূতকে পাঠাবে নাথ, কবে	১৭৪
প্রেমের হাতে ধরা দেব	১৭২
ফুলের মতন আপনি ফুটাও গান	১০২
বজ্রে তোমার বাজে বাঁশি । স্বর ১৩	৮৬
বিপদে মোরে রক্ষা করো । স্বর ২৫	৫
বিশ্ব যখন নিদ্রামগন । স্বর ৩৮	৭১
বিশ্বসাথে যোগে যেথায় বিহার' । স্বর ৩৭	১০৬
ভজন পূজন সাধন আরাধনা	১৩৭
ভেবেছিছু মনে যা হবার তারি শেষে	১৪৩
মনকে, আমার কায়াকে	১৬০*
মনে করি এইখানে শেষ	১৭৬
মরণ যেদিন দিনের শেষে	১৩০
মানের আসন, আরামশয়ন	১৪১
মুখ ফিরায়ে রব তোমার পানে	১১০
মেঘের 'পরে মেঘ জমেছে । কেতকী ও স্বর ৩৭	১২
মেনেছি, হার মেনেছি	৭৪
যখন আমায় বাঁধ' আগে পিছে	১৫৪
যতকাল তুই শিশুর মতো	১৫৫
যতবার আলো জ্বালাতে চাই । স্বর ৩৮	৮৪
যদি তোমার দেখা না পাই, প্রভু । স্বর ৩৮	২৮
যা দিয়েছ আমার এ প্রাণ ভরি	১৫৮
যা হারিয়ে যায় তা আগলে বসে । স্বর ৩৮	৪৮
যাত্রী আমি ওরে । কাব্যগীতি	১৩৪

যাবার দিনে এই কথাটি	১৬১
যেথায় তোমার লুট হতেছে ভুবনে । স্বর ৩৭	১০৮
যেথায় থাকে সবার অধম । স্বর ৩৮	১২২
যেন শেষ গানে মোর সব রাগিণী পুরে	১৫৩
রাজার মতো বেশে তুমি সাজাও যে শিশুরে	১৪৬
রূপসাগরে ডুব দিয়েছি । স্বর ৩৮	৫৫
লেগেছে অমল ধবল পালে । শেফালি	১৪
শরতে আজ কোন্ অতিথি । শেফালি	৪৫
শেষের মধ্যে অশেষ আছে	১৭৭
সংসারেতে আর যাহারা	১৭৩
সবা হতে রাখব তোমায়	৮৫
সভা যখন ভাঙবে তখন	৮৮
সীমার মাঝে, অসীম, তুমি । স্বর ৩৭	১৩৯
সুন্দর, তুমি এসেছিলে আজ প্রাতে	৭৯
সে যে পাশে এসে বসেছিল । স্বর ৩৮	৭২
হে মোর চিত্ত, পুণ্য তীর্থে । স্বর ৪৭	১১৮
হে মোর দুর্ভাগা দেশ, যাদের করেছ অপমান	১২৩
হে মোর দেবতা, ভরিয়া এ দেহ প্রাণ । স্বর ৩৭	১১৩
হেথা যে গান গাইতে আসা আমার । স্বর ৩৮	৪৬
হেথায় তিনি কোল পেতেছেন	৫৮
হেরি অহরহ তোমারি বিরহ । স্বর ৩৭	৩০

কেতকী বা কাব্যগীতি স্বরবিতান গ্রন্থমালা - ভুক্ত হইয়াছে । শেফালি'ও
অনুর ভবিষ্যতে স্বরবিতানের অন্ততম ধরুরূপে প্রকাশিত হইবে

গীতাঞ্জলি

আমার মাথা নত করে দাও হে তোমার
চরণধুলার তলে ।

সকল অহংকার হে আমার
ডুবাও চোখের জলে ।

নিজেরে করিতে গৌরব দান
নিজেরে কেবলই করি অপমান,
আপনারে শুধু ঘেরিয়া ঘেরিয়া
ঘুরে মরি পলে পলে ।

সকল অহংকার হে আমার
ডুবাও চোখের জলে ।

আমারে না যেন করি প্রচার
আমার আপন কাজে—
তোমার ইচ্ছা করো হে পূর্ণ
আমার জীবনমাঝে ।

যাচি হে তোমার চরম শাস্তি,
পরানে তোমার পরম কাস্তি,
আমারে আড়াল করিয়া দাঁড়াও
হৃদয়পদ্মদলে ।

সকল অহংকার হে আমার
ডুবাও চোখের জলে ।

আমি বহু বাসনায় প্রাণপণে চাই,
 বঞ্চিত করে বাঁচালে মোরে ।
 এ কৃপা কঠোর সঞ্চিত মোর
 জীবন ভ'রে ।
 না চাহিতে মোরে যা করেছ দান,
 আকাশ আলোক তনু মন প্রাণ,
 দিনে দিনে তুমি নিতেছ আমায়
 - সে মহাদানেরই যোগ্য করে
 অতি-ইচ্ছার সংকট হতে
 বাঁচায়ে মোরে ।

আমি কখনো বা ভুলি, কখনো বা চলি
 তোমার পথের লক্ষ্য ধরে—
 তুমি নিষ্ঠুর সম্মুখ হতে
 যাও যে সরে ।
 এ যে তব দয়া জানি জানি হায়,
 নিতে চাও ব'লে ফিরাও আমায়,
 পূর্ণ করিয়া লবে এ জীবন
 তব মিলনেরই যোগ্য করে
 আধা-ইচ্ছার সংকট হতে
 বাঁচায়ে মোরে ।

৩

কত অজানারে জানাইলে তুমি,
কত ঘরে দিলে ঠাই—
দূরকে করিলে নিকট, বন্ধু,
পরকে করিলে ভাই ।

পুরানো আবাস ছেড়ে যাই যবে
মনে ভেবে মরি কী জানি কী হবে,
নূতনের মাঝে তুমি পুরাতন
সে কথা যে ভুলে যাই ।
দূরকে করিলে নিকট, বন্ধু,
পরকে করিলে ভাই ।

জীবনে মরণে নিখিল ভুবনে
যখনি যেখানে লবে,
চিরজনমের পরিচিত ওহে,
তুমিই চিনাবে সবে ।

তোমারে জানিলে নাহি কেহ পর,
নাহি কোনো মানা, নাহি কোনো ডর,
সবারে মিলায়ে তুমি জাগিতেছ—
দেখা যেন সদা পাই ।
দূরকে করিলে নিকট, বন্ধু,
পরকে করিলে ভাই ।

বিপদে মোরে রক্ষা করো

এ নহে মোর প্রার্থনা,

বিপদে আমি না যেন করি ভয় ।

ছঃখতাপে ব্যথিত চিতে

নাই বা দিলে সাঙ্ঘনা,

ছঃখে যেন করিতে পারি জয় ।

সহায় মোর না যদি জুটে

নিজের বল না যেন টুটে,

সংসারেতে ঘটিলে ক্ষতি

লভিলে শুধু বঞ্চনা

নিজের মনে না যেন মানি ক্ষয় ।

আমারে তুমি করিবে ত্রাণ

এ নহে মোর প্রার্থনা,

তরিতে পারি শক্তি যেন রয় ।

আমার ভার লাঘব করি

নাই বা দিলে সাঙ্ঘনা,

বহিতে পারি এমনি যেন হয় ।

নম্রশিরে সুখের দিনে

তোমারি মুখ লইব চিনে,

ছঃখের রাতে নিখিল ধরা

যেদিন করে বঞ্চনা

তোমারে যেন না করি সংশয় ।

অন্তর মম বিকশিত করো

অন্তরতর হে ।

নির্মল করো, উজ্জল করো,

সুন্দর করো হে ।

জাগ্রত করো, উদ্বৃত করো,

নির্ভয় করো হে ।

মঙ্গল করো, নিরলস নিঃসংশয় করো হে ।

অন্তর মম বিকশিত করো,

অন্তরতর হে ।

যুক্ত করো হে সবার সঙ্গে,

মুক্ত করো হে বন্ধ,

সঞ্চার করো সকল কর্মে

শান্ত তোমার ছন্দ ।

চরণপদ্মে মম চিত নিঃস্পন্দিত করো হে,

নন্দিত করো, নন্দিত করো,

নন্দিত করো হে ।

অন্তর মম বিকশিত করো

অন্তরতর হে ।

প্রেমে প্রাণে গানে গন্ধে আলোকে পুলকে

প্লাবিত করিয়া নিখিল ছ্যালোক-ভুলোকে

তোমার অমল অমৃত পড়িছে ঝরিয়া ।

দিকে দিকে আজি টুটিয়া সকল বন্ধ

মুরতি ধরিয়া জাগিয়া উঠে আনন্দ ;

জীবন উঠিল নিবিড় সুধায় ভরিয়া ।

চেতনা আমার কল্যাণরসসরসে

শতদলসম ফুটিল পরম হরষে

সব মধু তার চরণে তোমার ধরিয়া ।

নীরব আলোকে জাগিল হৃদয়প্রান্তে

উদার উষার উদয়-অরুণ কান্তি,

অলস আঁখির আবরণ গেল সরিয়া ।

তুমি নব নব রূপে এসো প্রাণে ।
 এসো গঞ্জে বরনে, এসো গানে ।
 এসো অঙ্গে পুলকময় পরশে,
 এসো চিন্তে অমৃতময় হরষে,
 এসো মুগ্ধ মুদিত হু নয়ানে ।
 তুমি নব নব রূপে এসো প্রাণে ।

এসো নির্মল উজ্জ্বল কান্ত,
 এসো সুন্দর স্নিগ্ধ প্রশান্ত,
 এসো এসো হে বিচিত্র বিধানে ।
 এসো দুঃখে সুখে এসো মর্মে,
 এসো নিত্য নিত্য সব কর্মে,
 এসো সকল কর্ম-অবসানে ।
 তুমি নব নব রূপে এসো প্রাণে ।

অগ্রহায়ণ

১৩১৪ ৭

আজ ধানের খেতে রৌদ্রছায়ায়

লুকোচুরি খেলা ।

নীল আকাশে কে ভাসালে

সাদা মেঘের ভেলা ।

আজ ভ্রমর ভোলে মধু খেতে,

উড়ে বেড়ায় আলোয় মেতে ;

আজ কিসের তরে নদীর চরে

চখাচখির মেলা ।

ওরে যাব না আজ ঘরে রে ভাই,

যাব না আজ ঘরে ।

ওরে আকাশ ভেঙে বাহিরকে আজ

নেব রে লুঠ করে ।

যেন জোয়ার-জলে ফেনার রাশি

বাতাসে আজ ছুটছে হাসি,

আজ বিনা কাজে বাজিয়ে বাঁশি

কাটবে সকল বেলা ।

আনন্দেরই সাগর থেকে

এসেছে আজ বান ।

দাঁড় ধরে আজ বোস্ রে সবাই,

টান্ রে সবাই টান্ ।

বোঝা যত বোঝাই করি

করব রে পার দুখের তরী,

চেউয়ের 'পরে ধরব পাড়ি

যায় যদি যাক প্রাণ ।

আনন্দেরই সাগর থেকে

এসেছে আজ বান ।

কে ডাকে রে পিছন হতে

কে করে রে মানা,

ভয়ের কথা কে বলে আজ

ভয় আছে সব জানা ।

কোন্ শাপে কোন্ গ্রহের দোষে

সুখের ডাঙায় থাকব বসে,

পালের রশি ধরব কষি

চলব গেয়ে গান ।

আনন্দেরই সাগর থেকে

এসেছে আজ বান ।

তোমার সোনার থালায় সাজাব আজ
 হুখের অশ্রুধার ।
 জননী গো, গাঁথব তোমার
 গলার মুক্তাহার ।
 চন্দ্রসূর্য পায়ের কাছে
 মালা হয়ে জড়িয়ে আছে,
 তোমার বুকে শোভা পাবে আমার
 হুখের অলংকার ।

ধন ধান্য তোমারি ধন,
 কী করবে তা কও ।
 দিতে চাও তো দিয়ো আমায়,
 নিতে চাও তো লও ।
 হুখ আমার ঘরের জিনিস,
 খাঁটি রতন তুই তো চিনিস-
 তোর প্রসাদ দিয়ে তারে কিনিস,
 এ মোর অহংকার ।

আমরা বেঁধেছি কাশের গুচ্ছ, আমরা

গেঁথেছি শেফালিমাল।

নবীন ধানের মঞ্জরী দিয়ে

সাজিয়ে এনেছি ডালা।

এসো গো শারদলক্ষ্মী, তোমার

শুভ্র মেঘের রথে,

এসো নির্মল নীল পথে,

এসো ধৌত শ্যামল

আলো-ঝলমল

বনগিরিপর্বতে।

এসো মুকুটে পরিয়া শ্বেত শতদল

শীতল-শিশির-ঢালা

ঝরা মালতীর ফুলে

আসন বিছানো নিভৃত কুঞ্জে

ভরা গঙ্গার কূলে।

ফিরিছে মরাল ডানা পাতিবারে

তোমার চরণমূলে।

গুঞ্জরতান তুলিয়ো তোমার

সোনার বীণার তারে

মৃদু মধু ঝংকারে,

হাসিঢালা সুর গলিয়া পড়িবে

ক্ষণিক অক্ষধারে।

রহিয়া রহিয়া যে পরশমণি
ঝলকে অলককোণে,
পলকের তরে সক্রমণ করে
বুলায়ো বুলায়ো মনে—
সোনা হয়ে যাবে সকল ভাবনা,
আঁধার হইবে আলা ।

৩ ভাদ্র ১৩১৫
শান্তিনিকেতন

লোগেছে অমল ধবল পালে

মন্দ মধুর হাওয়া ।

দেখি নাই কভু দেখি নাই

এমন তরঙ্গী বাওয়া ।

কোন্ সাগরের পার হতে আনে

কোন্ সুদূরের ধন ।

ভেসে যেতে চায় মন,

ফেলে যেতে চায় এই কিনারায়

সব চাওয়া সব পাওয়া ।

পিছনে ঝরিছে ঝরঝর জল,

গুরুগুরু দেয়া ডাকে,

মুখে এসে পড়ে অরুণকিরণ

ছিন্ন মেঘের ফাঁকে ।

ওগো কাণ্ডারী, কে গো তুমি, কার

হাসিকান্নার ধন ।

ভেবে মরে মোর মন,

কোন্ সুরে আজ বাঁধিবে যন্ত্র

কী মন্ত্র হবে গাওয়া ।

৩ ভাদ্র ১৩১৫

শাস্তিনিকেতন

আমার নয়ন-ভুলানো এলে ।

আমি কী হেরিলাম হৃদয় মেলে ।

শিউলিতলার পাশে পাশে

ঝরা ফুলের রাশে রাশে

শিশির-ভেজা ঘাসে ঘাসে

অরুণরাঙা চরণ ফেলে

নয়ন-ভুলানো এলে ।

আলোছায়ার আঁচলখানি

লুটিয়ে পড়ে বনে বনে,

ফুলগুলি ঐ মুখে চেয়ে

কী কথা কয় মনে মনে ।

তোমায় মোরা করব বরণ,

মুখের ঢাকা করো হরণ,

ঐটুকু ঐ মেঘাবরণ

তু হাত দিয়ে ফেলো ঠেলে—

নয়ন-ভুলানো এলে ।

বনদেবীর দ্বারে দ্বারে

শুনি গভীর শঙ্খধ্বনি,

আকাশবীণার তারে তারে

জাগে তোমার আগমনী ।

কোথায় সোনার নূপুর বাজে,
বুঝি আমার হিয়ার মাঝে,
সকল ভাবে সকল কাজে
পাষণ-গালা সুধা ঢেলে—
নয়ন-ভুলানো এলে ।

৭ ভাদ্র ১৩১৫
শান্তিনিকেতন

জননী, তোমার করুণ চরণখানি
 হেরিনু আজি এ অরুণকিরণরূপে ।
 জননী, তোমার মরণহরণ বাণী
 নীরব গগনে ভরি উঠে চূপে চূপে ।

তোমারে নমি হে সকল ভুবন-মাঝে,
 তোমারে নমি হে সকল জীবন-কাজে ;
 তনু মন ধন করি নিবেদন আজি
 ভক্তিপাবন তোমার পূজার ধূপে ।
 জননী, তোমার করুণ চরণখানি
 হেরিনু আজি এ অরুণকিরণরূপে

জগৎ জুড়ে উদার সুরে
 আনন্দগান বাজে,
 সে গান কবে গভীর রবে
 বাজিবে হিয়ামাঝে ।

বাতাস জল আকাশ আলো
 সবারে কবে বাসিব ভালো,
 হৃদয়সভা জুড়িয়া তারা
 বসিবে নানা সাজে ।

নয়ন দুটি মেলিলে কবে
 পরান হবে খুশি,
 যে পথ দিয়া চলিয়া যাব
 সবারে যাব তুষ্টি ।

রয়েছ তুমি, এ কথা কবে
 জীবনমাঝে সহজ হবে—
 আপনি কবে তোমারি নাম
 ধ্বনিবে সব কাজে ।

মেঘের 'পরে মেঘ জমেছে,
 আঁধার করে আসে—
 আমায় কেন বসিয়ে রাখ
 একা দ্বারের পাশে ।

কাজের দিনে নানা কাজে
 থাকি নানা লোকের মাঝে,
 আজ আমি যে বসে আছি
 তোমারি আশ্বাসে ।
 আমায় কেন বসিয়ে রাখ
 একা দ্বারের পাশে ।

তুমি যদি না দেখা দাও
 কর আমায় হেলা,
 কেমন করে কাটে আমার
 এমন বাদল-বেলা ।

দূরের পানে মেলে আঁখি
 কেবল আমি চেয়ে থাকি,
 পরান আমার কেঁদে বেড়ায়
 ছরস্তু বাতাসে ।
 আমায় কেন বসিয়ে রাখ
 একা দ্বারের পাশে ।

কোথায় আলো, কোথায় ওরে আলো ।

বিরহানলে জ্বালো রে তারে জ্বালো ।

রয়েছে দীপ না আছে শিখা,

এই কি ভালে ছিল রে লিখা—

ইহার চেয়ে মরণ সে যে ভালো ।

বিরহানলে প্রদীপখানি জ্বালো ।

বেদনাদূতী গাহিছে, 'ওরে প্রাণ,

তোমার লাগি জাগেন ভগবান ।

নিশীথে ঘন অন্ধকারে

ডাকেন তোরে প্রেমাভিসারে,

হুঃখ দিয়ে রাখেন তোর মান ।

তোমার লাগি জাগেন ভগবান ।'

গগনতল গিয়েছে মেঘে ভরি,

বাদল-জল পড়িছে ঝরি ঝরি ।

এ ঘোর রাতে কিসের লাগি

পরান মম সহসা জাগি

এমন কেন করিছে মরি মরি ।

বাদল-জল পড়িছে ঝরি ঝরি ।

বিজুলি শুধু ক্ষণিক আভা হানে,

নিবিড়তর তিমির চোখে আনে ।

জানি না কোথা অনেক দূরে
বাজিল গান গভীর সুরে,
সকল প্রাণ টানিছে পথপানে ।
নিবিড়তর তিমির চোখে আনে ।

কোথায় আলো, কোথায় ওরে আলো !
বিরহানলে জ্বালো রে তারে জ্বালো ।
ডাকিছে মেঘ, হাঁকিছে হাওয়া,
সময় গেলে হবে না যাওয়া,
নিবিড় নিশা নিকষঘন কালো ।
পরান দিয়ে প্রেমের দীপ জ্বালো ।

আষাঢ় ১৩১৬

আজি শ্রাবণ-ঘন-গহন-মোহে
 গোপন তব চরণ ফেলে
 নিশার মতো নীরব ওহে
 সবার দিঠি এড়ায়ে এলে ।
 প্রভাত আজি মুদেছে আঁখি,
 বাতাস বৃথা যেতেছে ডাকি,
 নিলাজ নীল আকাশ ঢাকি
 নিবিড় মেঘ কে দিল মেলে ।

কূজনহীন কাননভূমি,
 ছয়ার দেওয়া সকল ঘরে,
 একেলা কোন্ পথিক তুমি
 পথিকহীন পথের 'পরে ।
 হে একা সখা, হে প্রিয়তম,
 রয়েছে খোলা এ ঘর মম,
 সমুখ দিয়ে স্বপনসম
 যেয়ো না মোরে হেলায় ঠেলে

আষাঢ়সন্ধ্যা ঘনিয়ে এল,

গেল রে দিন বয়ে ।

বাঁধনহারা বৃষ্টিধারা

ঝরছে রয়ে রয়ে ।

একলা বসে ঘরের কোণে

কী ভাবি যে আপন-মনে,

সজল হাওয়া যুথীর বনে

কী কথা যায় কয়ে ।

বাঁধনহারা বৃষ্টিধারা

ঝরছে রয়ে রয়ে ।

হৃদয়ে আজ ঢেউ দিয়েছে,

খুঁজে না পাই কূল ।

সৌরভে প্রাণ কাঁদিয়ে তুলে

ভিজে বনের ফুল ।

আঁধার রাতে প্রহরগুলি

কোন্ সুরে আজ ভরিয়ে তুলি,

কোন্ ভুলে আজ সকল ভুলি

আছি আকুল হয়ে ।

বাঁধনহারা বৃষ্টিধারা

ঝরছে রয়ে রয়ে ।

আজি ঝড়ের রাতে তোমার অভিসার,
পরানসখা বন্ধু হে আমার ।

আকাশ কাঁদে হতাশসম
নাই যে ঘুম নয়নে মম,
দুয়ার খুলি, হে প্রিয়তম,
চাই যে বারে বার ।

পরানসখা বন্ধু হে আমার ।

বাহিরে কিছু দেখিতে নাহি পাই,
তোমার পথ কোথায় ভাবি তাই ।

সুদূর কোন্ নদীর পারে,
গহন কোন্ বনের ধারে,
গভীর কোন্ অন্ধকারে
হতেছ তুমি পার ।

পরানসখা বন্ধু হে আমার ।

আষাঢ় ১৩১৬

জানি জানি কোন্ আদিকাল হতে
 ভাসালে আমারে জীবনের স্রোতে,
 সহসা হে প্রিয়, কত গৃহে পথে
 রেখে গেছ প্রাণে কত হরষন ।

কতবার তুমি মেঘের আড়ালে
 এমনি মধুর হাসিয়া দাঁড়ালে,
 অরুণকিরণে চরণ বাড়ালে,
 ললাটে রাখিলে শুভ পরশন

সঞ্চিত হয়ে আছে এই চোখে
 কত কালে কালে কত লোকে লোকে
 কত নব নব আলোকে আলোকে
 অরূপের কত রূপদরশন ।

কত যুগে যুগে, কেহ নাহি জানে,
 ভরিয়া ভরিয়া উঠেছে পরানে
 কত সুখে দুখে কত প্রেমে গানে
 অমৃতের কত রসবরষন ।

১০ ভাদ্র ১৩১৬
 বোলপুর

তুমি কেমন করে গান কর যে শুণী,
অবাক হয়ে শুনি, কেবল শুনি ।

সুরের আলো ভুবন ফেলে ছেয়ে,
সুরের হাওয়া চলে গগন বেয়ে,
পাষণ টুটে ব্যাকুল বেগে ধেয়ে
বহিয়া যায় সুরের সুরধ্বনী ।

মনে করি অমনি সুরে গাই,
কণ্ঠে আমার সুর খুঁজে না পাই ।
কইতে কী চাই, কইতে কথা বাধে ;
হার মেনে যে পরান আমার কাঁদে ;
আমায় তুমি ফেলেছ কোন্ কাঁদে
চৌদিকে মোর সুরের জাল বুনি ।

১০ ভাদ্র ১৩১৬
রাত্রি

অমন আড়াল দিয়ে লুকিয়ে গেলে
চলবে না।

এবার হৃদয়মাঝে লুকিয়ে বোসো,
কেউ জানবে না, কেউ বলবে না।
বিশ্বে তোমার লুকোচুরি,
দেশবিদেশে কতই ঘুরি,
এবার বলো আমার মনের কোণে
দেবে ধরা, ছলবে না।
আড়াল দিয়ে লুকিয়ে গেলে
চলবে না।

জানি আমার কঠিন হৃদয়
চরণ রাখার যোগ্য সে নয়,
সখা, তোমার হাওয়া লাগলে হিয়ায়
তবু কি প্রাণ গলবে না।

নাহয় আমার নাই সাধনা,
ঝরলে তোমার কুপার কণা
তখন নিমেষে কি ফুটবে না ফুল
চকিতে ফল ফলবে না।
আড়াল দিয়ে লুকিয়ে গেলে
চলবে না।

১১ ভাদ্র ১৩১৬, রাত্রি
বোলপুর

যদি তোমার দেখা না পাই, প্রভু,
এবার এ জীবনে
তবে তোমায় আমি পাই নি যেন
সে কথা রয় মনে
যেন ভুলে না যাই, বেদনা পাই
শয়নে স্বপনে ।

এ সংসারের হাতে
আমার যতই দিবস কাটে,
আমার যতই দু হাত ভরে ওঠে ধনে,
তবু কিছুই আমি পাই নি যেন
সে কথা রয় মনে ।
যেন ভুলে না যাই, বেদনা পাই
শয়নে স্বপনে ।

যদি আলসভরে
আমি বসি পথের 'পরে,
যদি ধুলায় শয়ন পাতি সযতনে,
যেন সকল পথই বাকি আছে
সে কথা রয় মনে ।
যেন ভুলে না যাই, বেদনা পাই
শয়নে স্বপনে ।

যতই উঠে হাসি,
ঘরে যতই বাজে বাঁশি,
ওগো যতই গৃহ সাজাই আয়োজনে,
যেন তোমায় ঘরে হয় নি আনা
সে কথা রয় মনে ।
যেন ভুলে না যাই, বেদনা পাই
শয়নে স্বপনে ।

১২ ভাদ্র ১৩১৬

হেরি অহরহ তোমারি বিরহ

ভুবনে ভুবনে রাজে হে ।

কত রূপ ধরে কাননে ভূধরে

আকাশে সাগরে সাজে হে ।

সারা নিশি ধরি তারায় তারায়

অনিমেষ চোখে নীরবে দাঁড়ায়,

পল্লবদলে শ্রাবণধারায়

তোমারি বিরহ বাজে হে ।

ঘরে ঘরে আজি কত বেদনায়

তোমারি গভীর বিরহ ঘনায়,

কত প্রেমে হয় কত বাসনায়

কত সুখে দুখে কাজে হে ।

সকল জীবন উদাস করিয়া

কত গানে সুরে গলিয়া ঝরিয়া

তোমারি বিরহ উঠিছে ভরিয়া

আমার হিয়ার মাঝে হে ।

১২ ভাদ্র ১৩১৬

রাত্রি

২৬

আর নাই রে বেলা, নামল ছায়া
ধরনীতে,

এখন চল্ রে ঘাটে কলসখানি
ভরে নিতে ।

জলধারার কলস্বরে
সন্ধ্যাগগন আকুল করে,
ওরে ডাকে আমায় পথের 'পরে
সেই ধ্বনিতে ।

চল্ রে ঘাটে কলসখানি
ভরে নিতে ।

এখন বিজন পথে করে না কেউ
আসা-যাওয়া—

ওরে প্রেমনদীতে উঠেছে ঢেউ,
উতল হাওয়া ।

জানি নে আর ফিরব কি না,
কার সাথে আজ হবে চিনা,
ঘাটে সেই অজানা বাজায় বীণা
তরনীতে ।

চল্ রে ঘাটে কলসখানি
ভরে নিতে ।

১৩ ভাদ্র ১৩১৬

আজ বারি ঝরে ঝর ঝর
ভরা বাদরে ।

আকাশভাঙা আকুল ধারা
কোথাও না ধরে ।

শালের বনে থেকে থেকে
ঝড় দোলা দেয় হেঁকে হেঁকে,
জল ছুটে যায় এঁকে বেঁকে
মাঠের 'পরে ।

আজ মেঘের জটা উড়িয়ে দিয়ে
নৃত্য কে করে ।

ওরে বৃষ্টিতে মোর ছুটেছে মন,
লুটেছে ঐ ঝড়ে,
বুক ছাপিয়ে তরঙ্গ মোর
কাহার পায়ে পড়ে ।

অস্তুরে আজ কী কলরোল,
দ্বারে দ্বারে ভাঙল আগল
হৃদয়মাঝে জাগল পাগল
আজি ভাদরে ।

আজ এমন করে কে মেতেছে
বাহিরে ঘরে ।

শ্রুত, তোমা লাগি আঁখি জাগে ;
 দেখা নাই পাই
 পথ চাই,
 সেও মনে ভালো লাগে ।

ধূলাতে বসিয়া দ্বারে
 ভিখারি হৃদয় হা রে
 তোমারি করুণা মাগে ।
 কৃপা নাই পাই
 শুধু চাই,
 সেও মনে ভালো লাগে ।

আজি এ জগতমাঝে
 কত সুখে কত কাজে
 চলে গেল সবে আগে ।
 সাথি নাই পাই
 তোমায় চাই,
 সেও মনে ভালো লাগে ।

চারি দিকে সুধাভরা
 ব্যাকুল শ্যামল ধরা
 কাঁদায় রে অনুরাগে ।

দেখা নাই নাই,
ব্যথা পাই,
সেও মনে ভালো লাগে ।

১৪ ভাদ্র ১৩১৬
রাত্রি

ধনে জনে আছি জড়িয়ে হায়,
তবু জান' মন তোমারে চায় ।

অস্তুরে আছি, হে অস্তুর্যামী—
আমা চেয়ে আমায় জানিছ, স্বামী—
সব সুখে দুখে ভুলে-থাকায়
জান' মম মন তোমারে চায় ।

ছাড়িতে পারি নি অহংকারে,
ঘুরে মরি শিরে বহিয়া তারে,
ছাড়িতে পারিলে বাঁচি যে হায়—
তুমি জান' মন তোমারে চায় ।

যা আছে আমার সকলি কবে
নিজ হাতে তুমি তুলিয়া লবে ।
সব ছেড়ে সব পাব তোমায়,
মনে মনে মন তোমারে চায় ।

৩০

এই তো তোমার প্রেম, ওগো
হৃদয়হরণ,
এই-যে পাতায় আলো নাচে
সোনার বরন ।

এই-যে মধুর আলসভরে
মেঘ ভেসে যায় আকাশ-'পরে,
এই-যে বাতাস দেহে করে

অমৃতক্ষরণ

এই তো তোমার প্রেম, ওগো
হৃদয়হরণ ।

প্রভাত-আলোর ধারায় আমার
নয়ন ভেসেছে ।

এই তোমারি প্রেমের বাণী
প্রাণে এসেছে ।

তোমারি মুখ ঐ বুয়েছে,
মুখে আমার চোখ থুয়েছে,
আমার হৃদয় আজ ছুঁয়েছে
তোমারি চরণ ।

১৬ ভাদ্র ১৩১৬

আমি হেথায় থাকি শুধু
 গাইতে তোমার গান,
 দিয়ে তোমার জগৎসভায়
 এইটুকু মোর স্থান ।

আমি তোমার ভূবনমাঝে
 লাগি নি নাথ, কোনো কাজে,
 শুধু কেবল সুরে বাজে
 অকাজের এই প্রাণ ।

নিশায় নীরব দেবালয়ে
 তোমার আরাধন,
 তখন মোরে আদেশ কোরো
 গাইতে হে রাজন্ ।

ভোরে যখন আকাশ জুড়ে
 বাজবে বীণা সোনার সুরে
 আমি যেন না রই দূরে
 এই দিয়ে মোর মান ।

দাও হে আমার ভয় ভেঙে দাও ।
 আমার দিকে ও-মুখ ফিরাও ।
 পাশে থেকে চিনতে নারি,
 কোন্ দিকে যে কী নেহারি,
 তুমি আমার স্বদ্বিহারী,
 হৃদয়পানে হাসিয়া চাও ।

বলো আমায় বলো কথা,
 গায়ে আমার পরশ করো ।
 দক্ষিণ হাত বাড়িয়ে দিয়ে
 আমায় তুমি তুলে ধরো ।
 যা বুঝি সব ভুল বুঝি হে,
 যা খুঁজি সব ভুল খুঁজি হে—
 হাসি মিছে, কান্না মিছে,
 সামনে এসে এ ভুল ঘুচাও ।

আবার এরা ঘিরেছে মোর মন ।

আবার চোখে নামে যে আবরণ ।

আবার এ যে নানা কথাই জমে,

চিন্তা আমার নানা দিকেই ভ্রমে,

দাহ আবার বেড়ে ওঠে ক্রমে,

আবার এ যে হারাই শ্রীচরণ ।

তব নীরব বাণী হৃদয়তলে

ডোবে না যেন লোকের কোলাহলে ।

সবার মাঝে আমার সাথে থাকো,

আমায় সদা তোমার মাঝে ঢাকো,

নিয়ত মোর চেতনা-পরে রাখো

আলোকে-ভরা উদার ত্রিভুবন

আমার মিলন লাগি তুমি

আসছ কবে থেকে ।

তোমার চন্দ্র সূর্য তোমায়

রাখবে কোথায় ঢেকে ।

কত কালের সকাল-সাঁঝে

তোমার চরণধ্বনি বাজে,

গোপনে দূত হৃদয়মাঝে

গেছে আমায় ডেকে ।

ওগো পথিক, আজকে আমার

সকল পরান ব্যোপে

থেকে থেকে হরষ যেন

উঠছে কেঁপে কেঁপে ।

যেন সময় এসেছে আজ,

ফুরালো মোর যা ছিল কাজ-

বাতাস আসে হে মহারাজ,

তোমার গন্ধ মেখে ।

এসো হে, এসো, সজল ঘন,
 বাদল-বরিষনে—
 বিপুল তব শ্যামল স্নেহে
 এসো হে এ জীবনে ।

এসো হে গিরিশিখর চুমি,
 ছায়ায় ঘিরি কাননভূমি—
 গগন ছেয়ে এসো হে তুমি
 গভীর গরজনে ।

ব্যথিয়ে উঠে নীপের বন
 পুলকভরা ফুলে ।
 উছলি উঠে কলরোদন
 নদীর কূলে কূলে ।

এসো হে এসো হৃদয়ভরা,
 এসো হে এসো পিপাসাহরা,
 এসো হে আঁখি-শীতল-করা,
 ঘনায় এসো মনে ।

পারবি না কি যোগ দিতে এই ছন্দে রে,

খসে যাবার ভেসে যাবার

ভাঙবারই আনন্দে রে ।

পাতিয়া কান শুনিস না যে

দিকে দিকে গগনমাঝে

মরণবীণায় কী সুর বাজে

তপন-তারা-চন্দ্রে রে

জ্বালিয়ে আগুন ধেয়ে ধেয়ে

জ্বলবারই আনন্দে রে ।

পাগল-করা গানের তানে

ধায় যে কোথা কেই বা জানে,

চায় না ফিরে পিছন-পানে

রয় না বাঁধা বন্ধে রে

লুটে যাবার ছুটে যাবার

চলবারই আনন্দে রে ।

সেই আনন্দ-চরণ-পাতে

ছয় ঋতু যে নৃত্যে মাতে,

প্লাবন বহে যায় ধরাতে

বরন-গীতে গন্ধে রে

ফেলে দেবার ছেড়ে দেবার
মরবারই আনন্দে রে ।

১৮ ভাদ্র ১৩১৬
বোলপুর

নিশার স্বপন ছুটল রে এই
ছুটল রে ।

টুটল বাঁধন টুটল রে ।

রইল না আর আড়াল প্রাণে,

বেরিয়ে এলেম জগৎপানে,

হৃদয়শতদলের সকল

দলগুলি এই ফুটল রে এই

ফুটল রে ।

ছয়ার আমার ভেঙে শেষে

দাঁড়ালে যেই আপনি এসে

নয়নজলে ভেসে হৃদয়

চরণতলে লুটল রে ।

আকাশ হতে প্রভাত-আলো

আমার পানে হাত বাড়ালো,

ভাঙা কারার দ্বারে আমার

জয়ধ্বনি উঠল রে এই

উঠল রে ।

শরতে আজ কোন্ অতিথি

এল প্রাণের দ্বারে ।

আনন্দগান গা রে হৃদয়,

আনন্দগান গা রে ।

নীল আকাশের নীরব কথা

শিশির-ভেজা ব্যাকুলতা

বেজে উঠুক আজি তোমার

বীণার তারে তারে ।

শশুখেতের সোনার গানে

যোগ দে রে আজ সমান তানে,

ভাসিয়ে দে সুর ভরা নদীর

অমল জলধারে ।

যে এসেছে তাহার মুখে

দেখ্ রে চেয়ে গভীর সুখে,

দুয়ার খুলে তাহার সাথে

বাহির হয়ে যা রে ।

১৮ ভাদ্র ১৩১৬

শান্তিনিকেতন

হেথা যে গান গাইতে আসা আমার
 হয় নি সে গান গাওয়া—

আজ্ঞে কেবলই সুর সাধা, আমার
 কেবল গাইতে চাওয়া ।

আমার লাগে নাই সে সুর, আমার
 বাঁধে নাই সে কথা,

শুধু প্রাণেরই মাঝখানে আছে
 গানের ব্যাকুলতা ।

আজ্ঞে ফোটে নাই সে ফুল, শুধু
 বহেছে এক হাওয়া ।

আমি দেখি নাই তার মুখ, আমি
 শুনি নাই তার বাণী,

কেবল শুনি ক্ষণে ক্ষণে তাহার
 পায়ের ধ্বনিখানি ।

আমার দ্বারের সমুখ দিয়ে সে জন
 করে আসা-যাওয়া ।

শুধু আসন পাতা হল আমার
 সারাটি দিন ধরে—

ঘরে হয় নি প্রদীপ জ্বালা, তারে
 ডাকব কেমন ক'রে ।

আছি পাবার আশা নিয়ে, তারে
হয় নি আমার পাওয়া

২৭ ভাদ্র ১৩১৬
কলিকাতা

যা হারিয়ে যায় তা আগলে বসে
 রইব কত আর ।
 আর পারি নে রাত জাগতে হে নাথ,
 ভাবতে অনিবার ।
 আছি রাত্রিদিবস ধরে
 দুয়ার আমার বন্ধ করে,
 আসতে যে চায় সন্দেহে তায়
 তাড়াই বারে বার ।

তাই তো কারো হয় না আসা
 আমার একা ঘরে ।
 আনন্দময় ভুবন তোমার
 বাইরে খেলা করে ।
 তুমিও বুঝি পথ নাহি পাও,
 এসে এসে ফিরিয়া যাও,
 রাখতে যা চাই রয় না তাও—
 ধুলায় একাকার ।

১ আশ্বিন ১৩১৬
 কলিকাতা

এই মলিন বস্ত্র ছাড়তে হবে
 হবে গো এইবার—
 আমার এই মলিন অহংকার।
 দিনের কাজে ধুলা লাগি
 অনেক দাগে হল দাগি,
 এমনি তপ্ত হয়ে আছে
 সহ্য করা ভার।
 আমার এই মলিন অহংকার।

এখন তো কাজ সাক্ষ হ'ল
 দিনের অবসানে,
 হল রে তাঁর আসার সময়,
 আশা এল প্রাণে।
 স্নান করে আয় এখন তবে,
 প্রেমের বসন পরতে হবে,
 সন্ধ্যাবনের কুসুম তুলে
 গাঁথতে হবে হার।
 ওরে আয়, সময় নেই যে আর।

গায়ে আমার পুলক লাগে,

চোখে ঘনায় ঘোর—

হৃদয়ে মোর কে বেঁধেছে

রাঙা রাখির ডোর ।

আজিকে এই আকাশতলে

জলে স্থলে ফুলে ফলে

কেমন ক'রে, মনোহরণ,

ছড়ালে মন মোর ।

কেমন খেলা হল আমার

আজি তোমার সনে ।

পেয়েছি কি খুঁজে বেড়াই

ভেবে না পাই মনে ।

আনন্দ আজ কিসের ছলে

কাঁদিতে চায় নয়নজলে,

বিরহ আজ মধুর হয়ে

করেছে প্রাণ ভোর ।

২৫ আশ্বিন ১৩১৬

শিলাইদহ

প্রভু, আজি তোমার দক্ষিণ হাত
 রেখো না ঢাকি ।
 এসেছি তোমারে, হে নাথ,
 পরাতে রাখি ।

যদি বাঁধি তোমার হাতে
 পড়ব বাঁধা সবার সাথে,
 যেখানে যে আছে কেহই
 রবে না বাকি ।

আজি যেন ভেদ নাহি রয়
 আপনা পরে,
 তোমায় যেন এক দেখি হে
 বাহিরে ঘরে ।

তোমার সাথে যে বিচ্ছেদে
 ঘুরে বেড়াই কেঁদে কেঁদে
 ক্ষণেক-তরে ঘুচাতে তাই
 তোমারে ডাকি ।

২৭ আশ্বিন ১৩১৬
 শিলাইদহ

জগতে আনন্দযজ্ঞে আমার নিমন্ত্রণ ।

ধন্য হল ধন্য হল মানবজীবন ।

নয়ন আমার রূপের পুরে
সাধ মিটায়ে বেড়ায় ঘুরে,
শ্রবণ আমার গভীর সুরে
হয়েছে মগন ।

তোমার যজ্ঞে দিয়েছ ভার,

বাজাই আমি বাঁশি ।

গানে গানে গেঁথে বেড়াই

প্রাণের কান্নাহাসি ।

এখন সময় হয়েছে কি ।

সভায় গিয়ে তোমায় দেখি’

জয়ধ্বনি শুনিয়ে যাব,

এ মোর নিবেদন ।

৩০ আশ্বিন ১৩১৬

শিলাইদহ

আলোয় আলোকময় ক'রে হে

এলে আলোর আলো ।

আমার নয়ন হতে আঁধার

মিলালো মিলালো ।

সকল আকাশ সকল ধরা

আনন্দে হাসিতে ভরা,

যে দিক পানে নয়ন মেলি

ভালো সবই ভালো ।

তোমার আলো গাছের পাতায়

নাচিয়ে তোলে প্রাণ ।

তোমার আলো পাখির বাসায়

জাগিয়ে তোলে গান ।

তোমার আলো ভালোবেসে

পড়েছে মোর গায়ে এসে,

হৃদয়ে মোর নির্মল হাত

বুলালো বুলালো ।

২০ অগ্রহায়ণ ১৩১৬

- বোলপুর

আসনতলের মাটির 'পরে লুটিয়ে রব ।

তোমার চরণ-ধুলায় ধুলায় ধূসর হব ।

কেন আমায় মান দিয়ে আর দূরে রাখ,

চিরজনম এমন করে ভুলিয়ে নাকো,

অসম্মানে আনো টেনে পায়ে তব ।

তোমার চরণ- ধুলায় ধুলায় ধূসর হব ।

আমি তোমার যাত্রীদলের রব পিছে,

স্থান দিয়ো হে আমায় তুমি সবার নীচে ।

প্রসাদ লাগি কত লোকে আসে ধেয়ে,

আমি কিছুই চাইব না তো, রইব চেয়ে—

সবার শেষে বাকি যা রয় তাহাই লব ।

তোমার চরণ- ধুলায় ধুলায় ধূসর হব ।

১০ পৌষ ১৩১৬

শান্তিনিকেতন

রূপসাগরে ডুব দিয়েছি
 অরূপ রতন আশা করি ;
 ঘাটে ঘাটে ঘুরব না আর
 ভাসিয়ে আমার জীর্ণ তরী ।

সময় যেন হয় রে এবার
 চেউ-খাওয়া সব চুকিয়ে দেবার,
 সুধায় এবার তলিয়ে গিয়ে
 অমর হয়ে রব মরি ।

যে গান কানে যায় না শোনা
 সে গান যেথায় নিত্য বাজে,
 প্রাণের বীণা নিয়ে যাব
 সেই অতলের সভা-মাঝে ।
 চিরদিনের সুরটি বেঁধে
 শেষ গানে তার কান্না কেঁদে
 নীরব যিনি তাঁহার পায়ে
 নীরব বীণা দিব ধরি ।

১২ পৌষ ১৩১৬
 শান্তিনিকেতন

আকাশতলে উঠল ফুটে
 আলোর শতদল ।
 পাপড়িগুলি থরে থরে
 ছড়ালো দিক্-দিগন্তরে,
 ঢেকে গেল অন্ধকারের
 নিবিড় কালো জল ।
 মাঝখানেতে সোনার কোষে
 আনন্দে ভাই, আছি বসে—
 আমায় ঘিরে ছড়ায় ধীরে
 আলোর শতদল ।

আকাশেতে ঢেউ দিয়ে রে
 বাতাস বহে যায় ।
 চার দিকে গান বেজে ওঠে,
 চার দিকে প্রাণ নাচে ছোট্টে,
 গগনভরা পরশখানি
 লাগে সকল গায় ।
 ডুব দিয়ে এই প্রাণসাগরে
 নিতেছি প্রাণ বক্ষ ভরে,
 ফিরে ফিরে আমায় ঘিরে
 বাতাস বহে যায় ।

দশ দিকেতে আঁচল পেতে
কোল দিয়েছে মাটি ।
রয়েছে জীব যে যেখানে
সকলকে সে ডেকে আনে,
সবার হাতে সবার পাতে
অন্ন সে দেয় বাঁটি ।
ভরেছে মন গীতে গন্ধে,
বসে আছি মহানন্দে,
আমায় ঘিরে আঁচল পেতে
কোল দিয়েছে মাটি ।

আলো, তোমায় নমি, আমার
মিলাক অপরাধ ।
ললাটেতে রাখো আমার
পিতার আশীর্বাদ ।
বাতাস, তোমায় নমি, আমার
ঘুচুক অবসাদ ।
সকল দেহে বুলায়ে দাও
পিতার আশীর্বাদ ।
মাটি, তোমায় নমি, আমার
মিটুক সর্ব সাধ ।
গৃহ ভরে ফলিয়ে তোলো
পিতার আশীর্বাদ ।

হেথায় তিনি কোল পেতেছেন
 আমাদের এই ঘরে ।
 আসনটি তাঁর সাজিয়ে দে ভাই,
 মনের মতো ক'রে ।
 গান গেয়ে আনন্দমনে
 ঝাঁটিয়ে দে সব ধূলা ।
 ষত্ন করে দূর করে দে
 আবর্জনাগুলা ।
 জল ছিটিয়ে ফুলগুলি রাখ্
 সাজিখানি ভরে—
 আসনটি তাঁর সাজিয়ে দে ভাই,
 মনের মতো করে ।

দিন-রজনী আছেন তিনি
 আমাদের এই ঘরে,
 সকালবেলায় তাঁরি হাসি
 আলোক ঢেলে পড়ে ।
 যেমনি ভোরে জেগে উঠে
 নয়ন মেলে চাই,
 খুশি হয়ে আছেন চেয়ে
 দেখতে মোরা পাই ।
 তাঁরি মুখের প্রসন্নতায়
 সমস্ত ঘর ভরে ।

সকালবেলায় তাঁরি হাসি

আলোক ঢেলে পড়ে ।

একলা তিনি বসে থাকেন

আমাদের এই ঘরে

আমরা যখন অগ্নি কোথাও

চলি কাজের তরে ।

ঘরের কাছে তিনি মোদের

এগিয়ে দিয়ে যান—

মনের সুখে ধাই রে পথে,

আনন্দে গাই গান ।

দিনের শেষে ফিরি যখন

নানা কাজের পরে,

দেখি তিনি একলা বসে

আমাদের এই ঘরে ।

তিনি জেগে বসে থাকেন

আমাদের এই ঘরে

আমরা যখন অচেতনে

ঘুমাই শয্যা-পরে ।

জগতে কেউ দেখতে না পায়

লুকানো তাঁর বাতি,

আঁচল দিয়ে আড়াল ক'রে

জ্বালান সারা রাতি ।

ঘুমের মধ্যে স্বপন কতই
আনাগোনা করে,
অন্ধকারে হাসেন তিনি
আমাদের এই ঘরে ।

শৌখ ১৩১৬

নিভৃত প্রাণের দেবতা
 যেখানে জাগেন একা,
 ভক্ত, সেথায় খোলো দ্বার,
 আজ লব তাঁর দেখা ।
 সারা দিন শুধু বাহিরে
 ঘুরে ঘুরে কারে চাহি রে,
 সন্ধ্যাবেলার আরতি
 হয় নি আমার শেখা ।

তব জীবনের আলোতে
 জীবনপ্রদীপ জ্বালি
 হে পূজারি, আজ নিভৃতে
 সাজাব আমার থালি ।
 যেথা নিখিলের সাধনা
 পূজালোক করে রচনা
 সেথায় আমিও ধরিব
 একটি জ্যোতির রেখা

১৭ পৌষ ১৩১৬
 শান্তিনিকেতন

কোন্ আলোতে প্রাণের প্রদীপ
 জ্বালিয়ে তুমি ধরায় আস—
 সাধক ওগো, প্রেমিক ওগো,
 পাগল ওগো, ধরায় আস ।

এই অকূল সংসারে
 ছুঃখ-আঘাত তোমার প্রাণে বীণা ঝংকারে ।
 ঘোর বিপদমাঝে
 কোন্ জননীর মুখের হাসি দেখিয়া হাস ।

তুমি কাহার সঙ্কানে
 সকল সুখে আগুন জ্বলে বেড়াও কে জানে ।
 এমন ব্যাকুল ক'রে
 কে তোমারে কাঁদায় যারে ভালোবাস ।

তোমার ভাবনা কিছু নাই—
 কে যে তোমার সাথের সাথি ভাবি মনে তাই ।
 তুমি মরণ ভুলে
 কোন্ অনন্ত প্রাণ-সাগরে আনন্দে ভাস ।

তুমি আমার আপন, তুমি আছ আমার কাছে,
 এই কথাটি বলতে দাও হে বলতে দাও ।
 তোমার মাঝে মোর জীবনের সব আনন্দ আছে,
 এই কথাটি বলতে দাও হে বলতে দাও ।

আমায় দাও সুধাময় সুর,
 আমার বাণী করো সুমধুর—
 আমার প্রিয়তম তুমি, এই কথাটি
 বলতে দাও হে বলতে দাও ।

এই নিখিল আকাশ ধরা
 এ যে তোমায় দিয়ে ভরা,
 আমায় হৃদয় হতে এই কথাটি
 বলতে দাও হে বলতে দাও ।

দুখী জেনেই কাছে আস,
 ছোটো ব'লেই ভালোবাস,
 আমার ছোটো মুখে এই কথাটি
 বলতে দাও হে বলতে দাও !

নামাও নামাও আমায় তোমার
 চরণতলে,
 গলাও হে মন, ভাসাও জীবন
 নয়নজলে ।

একা আমি অহংকারের
 উচ্চ অচলে—
 পাষাণ-আসন ধুলায় লুটাও,
 ভাঙো সবলে ।
 নামাও নামাও আমায় তোমার
 চরণতলে ।

কী লয়ে বা গর্ব করি
 ব্যর্থ জীবনে ।
 ভরা গৃহে শূন্য আমি
 তোমা বিহনে ।

দিনের কর্ম ডুবেছে মোর
 আপন অতলে,
 সন্ধ্যাবেলার পূজা যেন
 যায় না বিফলে ।
 নামাও নামাও আমায় তোমার
 চরণতলে ।

আজি
কার

গন্ধবিধুর সমীরণে
সন্ধানে ফিরি বনে বনে ।
আজি ক্ষুদ্র নীলাশ্বরমাঝে
একি চঞ্চল ক্রন্দন বাজে ।
সুদূর দিগন্তের সকরণ সংগীত
লাগে মোর চিন্তায় কাজে—
আমি খুঁজি করে অন্তরে মনে
গন্ধবিধুর সমীরণে ।

ওগো
সুখে

জানি না কী নন্দনরাগে
উৎসুক যৌবন জাগে ।
আজি আশ্রমুকুলসৌগন্ধ্য
নব- পল্লবমর্মরছন্দে,
চন্দ্রকিরণসুধাসিঞ্চিতে অশ্বরে
অশ্রুসরস মহানন্দে
আমি পুলকিত কার পরশনে
গন্ধবিধুর সমীরণে ।

ফাল্গুন ১৩১৬
বোলপুর

আজি বসন্ত জাগ্রত দ্বারে ।

তব অবগুণ্ঠিত কুণ্ঠিত জীবনে

কোরো না বিড়ম্বিত তারে ।

আজি খুলিয়ো হৃদয়দল খুলিয়ো,

আজি ভুলিয়ো আপন-পর ভুলিয়ো,

এই সংগীতমুখরিত গগনে

তব গন্ধ তরঙ্গিয়া তুলিয়ো ।

এই বাহির-ভুবনে দিশা হারায়ে

দিয়ো ছড়ায়ে মাধুরী ভারে ভারে ।

অতি নিবিড় বেদনা বনমাঝে রে

আজি পল্লবে পল্লবে বাজে রে—

দূরে গগনে কাহার পথ চাহিয়া

আজি ব্যাকুল-বসুন্ধরা সাজে রে ।

মোর পরানে দখিন বায়ু লাগিছে,

কারে দ্বারে দ্বারে কর হানি মাগিছে,

এই সৌরভবিহ্বল রজনী

কার চরণে ধরনীতলে জাগিছে ।

ওগো সুন্দর, বল্লভ, কান্ত,

তব গম্ভীর আহ্বান কারে ।

২৬ চৈত্র ১৩১৬

বোলপুর

তব সিংহাসনের আসন হতে
 এলে তুমি নেমে—
 মোর বিজন ঘরের দ্বারের কাছে
 দাঁড়ালে, নাথ, থেমে ।

একলা বসে আপন-মনে
 গাইতেছিলেম গান,
 তোমার কানে গেল সে সুর,
 এলে তুমি নেমে—
 মোর বিজন ঘরের দ্বারের কাছে
 দাঁড়ালে, নাথ, থেমে ।

তোমার সভায় কত-না গান
 কতই আছেন গুণী ;
 গুণহীনের গানখানি আজ
 বাজল তোমার প্রেমে ।

লাগল বিশ্বতানের মাঝে
 একটি করুণ সুর,
 হাতে লয়ে বরণমালা
 এলে তুমি নেমে—
 মোর বিজন ঘরের দ্বারের কাছে
 দাঁড়ালে, নাথ, থেমে ।

তুমি এবার আমায় লহো হে নাথ, লহো ।

এবার তুমি ফিরো না হে—

হৃদয় কেড়ে নিয়ে রহো ।

যে দিন গেছে তোমা বিনা

তারে আর ফিরে চাহি না,

যাক সে ধুলাতে ।

এখন তোমার আলোয় জীবন মেলে

যেন জাগি অহরহ ।

কী আবেশে কিসের কথায়

ফিরেছি হে যথায় তথায়

পথে প্রান্তরে,

এবার বুকের কাছে ও মুখ রেখে

তোমার আপন বাণী কহো ।

কত কলুষ কত ফাঁকি

এখনো যে আছে বাকি

মনের গোপনে—

আমায় তার লাগি আর ফিরায়ো না,

তারে আগুন দিয়ে দহো ।

জীবন যখন শুকায়ে যায়
 করুণাধারায় এসো ।
 সকল মাধুরী লুকায়ে যায়,
 গীতসুধারসে এসো ।

কর্ম যখন প্রবল-আকার
 গরজি উঠিয়া ঢাকে চারি ধার
 হৃদয়প্রান্তে হে নীরব নাথ,
 শাস্ত্রচরণে এসো ।

আপনারে যবে করিয়া কৃপণ,
 কোণে পড়ে থাকে দীনহীন মন
 ছয়ার খুলিয়া হে উদার নাথ,
 রাজসমারোহে এসো ।

বাসনা যখন বিপুল ধুলায়
 অন্ধ করিয়া অবোধে ভুলায়
 ওহে পবিত্র, ওহে অনিদ্র,
 রুদ্ধ আলোকে এসো ।

২৮ চৈত্র ১৩১৬

এবার নীরব করে দাও হে তোমার
মুখর কবিরে ।

ভার হৃদয়বাঁশি আপনি কেড়ে
বাজাও গভীরে ।

নিশীথরাতের নিবিড় সুরে
বাঁশিতে তান দাও হে পুরে,
যে তান দিয়ে অবাক কর
গ্রহশশীরে ।

যা-কিছু মোর ছড়িয়ে আছে
জীবনমরণে,
গানের টানে মিলুক এসে
তোমার চরণে ।

বহু দিনের বাক্যরাশি
এক নিমেষে যাবে ভাসি,
একলা বসে শুনব বাঁশি
অকূল তিমিরে ।

৩০ চৈত্র ১৩১৬

৬০

বিশ্ব যখন নিদ্রামগন,
গগন অঙ্ককার,
কে দেয় আমার বীণার তারে
এমন ঝংকার ।
নয়নে ঘুম নিল কেড়ে,
উঠে বসি শয়ন ছেড়ে,
মেলে আঁখি চেয়ে থাকি—
পাই নে দেখা তার ।

গুঞ্জরিয়া গুঞ্জরিয়া
প্রাণ উঠিল পুরে,
জানি নে কোন্ বিপুল বাণী
বাজে ব্যাকুল সুরে ।
কোন্ বেদনায় বুঝি না রে
হৃদয় ভরা অশ্রুভারে,
পরিয়ে দিতে চাই কাহারে
আপন কণ্ঠহার ।

৪ বৈশাখ ১৩১৭

সে যে পাশে এসে বসেছিল
 তবু জাগি নি ।
 কী ঘুম তোরে পেয়েছিল,
 হতভাগিনী ।
 এসেছিল নীরব রাতে,
 বীণাখানি ছিল হাতে,
 স্বপনমাঝে বাজিয়ে গেল
 গভীর রাগিনী ।

জেগে দেখি, দখিন হাওয়া
 পাগল করিয়া
 গন্ধ তাহার ভেসে বেড়ায়
 আঁধার ভরিয়া ।
 কেন আমার রজনী যায়,
 কাছে পেয়ে কাছে না পায়,
 কেন গো তার মালার পরশ
 বুকে লাগে নি ।

১২ বৈশাখ ১৩১৭
 বোলপুর

তোরা শুনিস নি কি শুনিস নি তার পায়ের ধ্বনি,

ঐ যে আসে, আসে, আসে ।

যুগে যুগে পলে পলে দিন-রজনী

সে যে আসে, আসে, আসে ।

গেয়েছি গান যখন যত

আপন-মনে খ্যাপার মতো

সকল সুরে বেজেছে তার

আগমনী—

সে যে আসে, আসে, আসে ।

কত কালের ফাগুন-দিনে বনের পথে

সে যে আসে, আসে, আসে ।

কত শ্রাবণ-অন্ধকারে মেঘের রথে

সে যে আসে, আসে, আসে ।

দুখের পরে পরম দুখে

তারই চরণ বাজে বুকে,

সুখে কখন বুলিয়ে সে দেয়

পরশমণি ।

সে যে আসে, আসে, আসে

৩ জ্যৈষ্ঠ ১৩১৭

কলিকাতা

মেনেছি, হার মেনেছি ।
 ঠেলতে গেছি তোমায় যত
 আমায় তত হেনেছি ।
 আমার চিন্তাগগন থেকে
 তোমায় কেউ যে রাখবে তেকে
 কোনোমতেই সহবে না সে
 বারেবারেই জেনেছি ।

অতীত জীবন ছায়ার মতো
 চলছে পিছে পিছে,
 কত মায়ার বাঁশির সুরে
 ডাকছে আমায় মিছে ।
 মিল ছুটেছে তাহার সাথে,
 ধরা দিলেম তোমার হাতে,
 যা আছে মোর এই জীবনে
 তোমার দ্বারে এনেছি ।

৭ জ্যৈষ্ঠ ১৩১৭
 তিনধরিয়া

একটি একটি করে তোমার

পুরানো তার খোলো,

সেতারখানি নূতন বেঁধে তোলো ।

ভেঙে গেছে দিনের মেলা,

বসবে সভা সঙ্ক্যাবেলা,

শেষের সুর যে বাজাবে তার

আসার সময় হল—

সেতারখানি নূতন বেঁধে তোলো ।

দুয়ার তোমার খুলে দাও গো

আঁধার আকাশ-পরে,

সপ্ত লোকের নীরবতা

আমুক তোমার ঘরে ।

এতদিন যে গেয়েছ গান

আজকে তারই হোক অবসান,

এ যন্ত্র যে তোমার যন্ত্র

সেই কথাটাই ভোলো ।

সেতারখানি নূতন বেঁধে তোলো ।

৮ জ্যৈষ্ঠ ১৩১৭

তিনধরিয়া

কবে আমি বাহির হলেম তোমারই গান গেয়ে—

সে তো আজকে নয় সে আজকে নয় ।

ভুলে গেছি কবে থেকে আসছি তোমায় চেয়ে—

সে তো আজকে নয় সে আজকে নয় ।

ঝরনা যেমন বাহিরে যায়,

জানে না সে কাহারে চায়,

তেমনি করে ধেয়ে এলেম

জীবনধারা বেয়ে—

সে তো আজকে নয় সে আজকে নয় ।

কতই নামে ডেকেছি যে,

কতই ছবি এঁকেছি যে,

কোন্ আনন্দে চলেছি তার

ঠিকানা না পেয়ে—

সে তো আজকে নয় সে আজকে নয় ।

পুষ্প যেমন আলোর লাগি

না জেনে রাত কাটায় জাগি

তেমনি তোমার আশায় আমার

হৃদয় আছে ছেয়ে—

সে তো আজকে নয় সে আজকে নয় ।

৯ জ্যৈষ্ঠ ১৩১৭

তিনধরিয়া

তোমার প্রেম যে বহিতে পারি
 এমন সাধ্য নাই ।
 এ সংসারে তোমার আমার
 মাঝখানেতে তাই
 কুপা করে রেখেছ নাথ
 অনেক ব্যবধান—
 দুঃখসুখের অনেক বেড়া,
 ধনজনমান ।
 আড়াল থেকে ক্ষণে ক্ষণে
 আভাসে দাও দেখা—
 কালো মেঘের ফাঁকে ফাঁকে
 রবির মূছ রেখা ।

শক্তি যারে দাও বহিতে
 অসীম প্রেমের ভার
 একেবারে সকল পর্দা
 ঘুচায়ে দাও তার ।
 না রাখ তার ঘরের আড়াল,
 না রাখ তার ধন,
 পথে এনে নিঃশেষে তায়
 কর অকিঞ্চন ।
 না থাকে তার মান অপমান,
 লজ্জাশরম ভয়,

একলা তুমি সমস্ত তার
বিশ্বভুবনময় ।
এমন করে মুখোমুখি
সামনে তোমার থাকা,
কেবলমাত্র তোমাতে প্রাণ
পূর্ণ করে রাখা,
এ দয়া যে পেয়েছে তার
লোভের সীমা নাই—
সকল লোভ সে সরিয়ে ফেলে
তোমায় দিতে ঠাই ।

১০ জ্যৈষ্ঠ ১৩১৭
তিনধরিয়া

সুন্দর, তুমি এসেছিলে আজ প্রাতে
অরুণবরন পারিজাত লয়ে হাতে ।

নিদ্রিত পুরী, পথিক ছিল না পথে,
একা চলি গেলে তোমার সোনার রথে,
বারেক থামিয়া মোর বাতায়ন-পানে
চেয়েছিলে তব করুণ নয়নপাতে ।

সুন্দর, তুমি এসেছিলে আজ প্রাতে ।

স্বপন আমার ভরেছিল কোন্ গন্ধে,
ঘরের আঁধার কেঁপেছিল কী আনন্দে,
ধুলায়-লুটানো নীরব আমার বীণা
বেজে উঠেছিল অনাহত কী আঘাতে ।

কতবার আমি ভেবেছিছু উঠি-উঠি,
আলস ত্যজিয়া পথে বাহিরাই ছুটি,
উঠিছু যখন তখন গিয়েছ চলে—

দেখা বুঝি আর হল না তোমার সাথে ।

সুন্দর, তুমি এসেছিলে আজ প্রাতে ।

১৭ জ্যৈষ্ঠ ১৩১৭

তিনধরিয়্য

আমার খেলা যখন ছিল তোমার সনে
 তখন কে তুমি তা কে জানত ।
 তখন ছিল না ভয়, ছিল না লাজ মনে,
 জীবন বহে যেত অশান্ত ।
 তুমি ভোরের বেলা ডাক দিয়েছ কত
 যেন আমার আপন সখার মতো,
 হেসে তোমার সাথে ফিরেছিলাম ছুটে
 সেদিন কত-না বন-বনান্ত ।

ওগো,
 সেদিন তুমি গাইতে যে-সব গান
 কোনো অর্থ তাহার কে জানত ।
 সঙ্গ তোরই গাইত আমার প্রাণ,
 সদা নাচত হৃদয় অশান্ত ।
 হঠাৎ খেলার শেষে আজ কী দেখি ছবি—
 স্তব্ধ আকাশ, নীরব শশী রবি,
 তোমার চরণপানে নয়ন করি নত
 ভুবন দাঁড়িয়ে আছে একান্ত ।

১৭ জ্যৈষ্ঠ ১৩১৬

ঐ রে তরী দিল খুলে ।

তোর বোঝা কে নেবে তুলে ।

সামনে যখন যাবি ওরে

থাক্-না পিছন পিছে পড়ে,

পিঠে তারে বহিতে গেলি,

একলা পড়ে রইলি কূলে ।

ঘরের বোঝা টেনে টেনে

পারের ঘাটে রাখলি এনে,

তাই-যে তোরে বারে বারে

ফিরতে হল গেলি ভুলে ।

ডাক্ রে আবার মাঝারে ডাক্,

বোঝা তোমার যাক ভেসে যাক,

জীবনখানি উজাড় করে

সঁপে দে তার চরণমূলে ।

১৮ জ্যৈষ্ঠ ১৩১৭

ঐশ্বরীয়া

চিন্তা আমার হারালো আজ
 মেঘের মাঝখানে,
 কোথায় ছুটে চলেছে সে
 কোথায় কে জানে ।

বিজুলি তা'র বীণার তারে
 আঘাত করে বারে বারে,
 বৃকের মাঝে বজ্র বাজে
 কী মহাতানে ।

পুঞ্জ পুঞ্জ ভারে ভারে
 নিবিড় নীল অন্ধকারে
 ছড়ালো রে অঙ্গ আমার,
 ছড়ালো প্রাণে ।

পাগল হাওয়া নৃত্যে মাতি
 হল আমার সাথের সাথি,
 অট্টহাসে ধায় কোথা সে
 বারণ না মানেন ।

১৮ জ্যৈষ্ঠ ১৩১৭
 তিনধরিয়া

ওগো মৌন, না যদি কণ্ঠ
 নাই কহিলে কথা ।
 বন্ধ ভরি বইব আমি
 তোমার নীরবতা ।

স্তব্ধ হয়ে রইব পড়ে
 রজনী রয় যেমন করে
 জ্বালিয়ে তারা নিমেষহারা
 ধৈর্যে অবনতা ।

হবে হবে প্রভাত হবে,
 আঁধার যাবে কেটে ।
 তোমার বাণী সোনার ধারা
 পড়বে আকাশ ফেটে ।

তখন আমার পাখির বাসায়
 জাগবে কি গান তোমার ভাষায় ।
 তোমার তানে ফোটাবে ফুল
 আমার বনলতা ?

১৮ জ্যৈষ্ঠ ১৩১৭
 ি রিয়া

ষতবার আলো জ্বালাতে চাই
 নিবে যায় বারে বারে ।
 আমার জীবনে তোমার আসন
 গভীর অন্ধকারে ।

যে লতাটি আছে শুকায়েছে মূল—
 কুঁড়ি ধরে শুধু, নাহি ফোটে ফুল,
 আমার জীবনে তব সেবা তাই
 বেদনার উপহারে ।

পূজাগোরব পুণ্যবিভব
 কিছু নাহি, নাহি লেশ,
 এ তব পূজারি পরিয়া এসেছে
 লজ্জার দীন বেশ ।

উৎসবে তার আসে নাই কেহ,
 বাজে নাই বাঁশি, সাজে নাই গেহ,
 কাঁদিয়া তোমায় এনেছে ডাকিয়া
 ভাঙা মন্দিরদ্বারে ।

২১ জ্যৈষ্ঠ ১৩১৭
 তিনধরিয়্যা

সবা হতে রাখব তোমায়
 আড়াল ক'রে
 হেন পূজার ঘর কোথা পাই
 আমার ঘরে ।

যদি আমার দিনে রাতে
 যদি আমার সবার সাথে
 দয়া ক'রে দাও ধরা তো
 রাখব ধরে ।

মান দিব যে তেমন মানী
 নই তো আমি,
 পূজা করি সে আয়োজন
 নাই তো স্বামী ।

যদি তোমায় ভালোবাসি
 আপনি বেজে উঠবে বাঁশি,
 আপনি ফুটে উঠবে কুমুম
 কানন ভ'রে ।

২১ জ্যৈষ্ঠ ১৩১৭

বস্ত্রে তোমার বাজে বাঁশি,
সে কি সহজ গান ।

সেই সুরেতে জাগব আমি
দাও মোরে সেই কান ।

ভুলব না আর সহজেতে,
সেই প্রাণে মন উঠবে মেতে
মৃত্যুমাঝে ঢাকা আছে
যে অস্তুহীন প্রাণ ।

সে ঝড় যেন সই আনন্দে
চিত্তবীণার তারে
সপ্তসিন্ধু দশদিগন্ত
নাচাও যে ঝংকারে ।

আরাম হতে ছিন্ন ক'রে
সেই গভীরে লও গো মোরে
অশান্তির অস্তুরে যেথায়
শান্তি সুমহান ।

২১ জ্যৈষ্ঠ ১৩১৭
তিনধরিয়া

দয়া দিয়ে হবে গো মোর
 জীবন ধুতে ।
 নইলে কি আর পারব তোমার
 চরণ ছুঁতে ।
 তোমায় দিতে পূজার ডালি
 বেরিয়ে পড়ে সকল কালী,
 পরান আমার পারি নে তাই
 পায়ে থুতে ।

এতদিন তো ছিল না মোর
 কোনো ব্যথা,
 সর্ব অঙ্গে মাখা ছিল
 মলিনতা ।
 আজ ঐ শুভ্র কোলের তরে
 ব্যাকুল হৃদয় কেঁদে মরে,
 দিয়ো না গো দিয়ো না আর
 ধুলায় শুতে ।

২৪ জ্যৈষ্ঠ ১৩১৭
 কলিকাতা

সভা যখন ভাঙবে তখন
 শেষের গান কি যাব গেয়ে ।
 হয়তো তখন কণ্ঠহারী
 মুখের পানে রব চেয়ে ।
 এখনো যে সুর লাগে নি,
 বাজবে কি আর সেই রাগিণী—
 প্রেমের ব্যথা সোনার তানে
 সঙ্ক্যাগগন ফেলবে ছেয়ে ?

এতদিন যে সেধেছি সুর
 দিনে রাতে আপন-মনে
 ভাগ্যে যদি সেই সাধনা
 সমাপ্ত হয় এই জীবনে—
 এ জনমের পূর্ণ বাণী
 মানসবনের পদুখানি
 ভাসাব শেষ সাগরপানে
 বিশ্বগানের ধারা বেয়ে ।

২৪ জ্যৈষ্ঠ ১৩১৭
 . কলিকাতা

চিরজনমের বেদনা,
 ওহে চিরজীবনের সাধনা,
 তোমার আগুন উঠুক হে জ্বলে,
 কৃপা করিয়ো না দুর্বল ব'লে,
 যত তাপ পাই সহিবারে চাই—
 পুড়ে হোক ছাই বাসনা ।

অমোঘ যে ডাক সেই ডাক দাও,
 আর দেরি কেন মিছে ।
 যা আছে বাঁধন বন্ধ জড়িয়ে
 ছিঁড়ে পড়ে যাক পিছে ।
 গরজি গরজি শঙ্খ তোমার
 বাজিয়া বাজিয়া উঠুক এবার,
 গর্ব টুটিয়া নিদ্রা ছুটিয়া
 জাগুক তীব্র চেতনা ।

২৬ জ্যৈষ্ঠ ১৩১৭
 কলিকাতা

তুমি যখন গান গাহিতে বল'
 গর্ব আমার ভরে ওঠে বুকে ;
 তুই আঁখি মোর করে ছলছল
 নিমেষহারা চেয়ে তোমার মুখে ।
 কঠিন কটু যা আছে মোর প্রাণে
 গলিতে চায় অমৃতময় গানে,
 সব সাধনা আরাধনা মম
 উড়িতে চায় পাখির মতো স্মুখে ।

তৃপ্ত তুমি আমার গীতরাগে,
 ভালো লাগে তোমার ভালো লাগে,
 জানি আমি এই গানেরই বলে
 বসি গিয়ে তোমারি সম্মুখে ।

মন দিয়ে যার নাগাল নাহি পাই
 গান দিয়ে সেই চরণ ছুঁয়ে যাই,
 সুরের ঘোরে আপনাকে যাই ভুলে—
 বন্ধু ব'লে ডাকি মোর প্রভুকে ।

ধায় যেন মোর সকল ভালোবাসা
 প্রভু, তোমার পানে, তোমার পানে, তোমার পানে ।
 যায় যেন মোর সকল গভীর আশা
 প্রভু, তোমার কানে, তোমার কানে, তোমার কানে ।

চিন্ত মম যখন যেথায় থাকে
 সাড়া যেন দেয় সে তোমার ডাকে,
 যত বাধা সব টুটে যায় যেন
 প্রভু, তোমার টানে, তোমার টানে, তোমার টানে ।

বাহিরের এই ভিক্ষাভরা থালি
 এবার যেন নিঃশেষে হয় খালি,
 অন্তর মোর গোপনে যায় ভরে
 প্রভু, তোমার দানে, তোমার দানে, তোমার দানে ।

হে বন্ধু মোর, হে অন্তরতর,
 এ জীবনে যা-কিছু সুন্দর
 সকলই আজ বেজে উঠুক সুরে
 প্রভু, তোমার গানে, তোমার গানে, তোমার গানে ।

২৮ জ্যৈষ্ঠ ১৩১৭
 কলিকাতা

ভারা দিনের বেলা এসেছিল
 আমার ঘরে—
 বলেছিল, একটি পাশে
 রইব প'ড়ে ।
 বলেছিল, দেবতাসেবায়
 আমরা হব তোমার সহায়—
 যা-কিছু পাই প্রসাদ লব
 পূজার পরে ।

এমনি করে দরিদ্র ক্ষীণ
 মলিন বেশে
 সংকোচেতে একটি কোণে
 রইল এসে ।
 রাতে দেখি প্রবল হয়ে
 পাশে আমার দেবালয়ে,
 মলিন হাতে পূজার বলি
 হরণ করে ।

২২ জ্যৈষ্ঠ ১৩১৭
 বোলপুর

তারা তোমার নামে বাটের মাঝে
 মাসুল লয় যে ধরি ।
 দেখি শেষে ঘাটে এসে
 নাইকো পারের কড়ি ।
 তারা তোমার কাজের ভানে
 নাশ করে গো ধনে প্রাণে,
 সামান্য যা আছে আমার
 লয় তা অপহরি ।

আজকে আমি চিনেছি সেই
 ছদ্মবেশী-দলে ।
 তারাও আমায় চিনেছে হায়
 শক্তিবহীন ব'লে ।
 গোপন মূর্তি ছেড়েছে তাই,
 লজ্জাশরম আর কিছু নাই,
 দাঁড়িয়েছে আজ মাথা তুলে
 পথ অবরোধ করি ।

২২ জ্যৈষ্ঠ ১৩১৭
 বোলপুর

এই জ্যোৎস্নারাতে জাগে আমার প্রাণ ;
 পাশে তোমার হবে কি আজ স্থান ।
 দেখতে পাব অপূর্ব সেই মুখ,
 রইবে চেয়ে হৃদয় উৎসুক,
 বারে বারে চরণ ঘিরে ঘিরে
 ফিরবে আমার অশ্রুভরা গান ?

সাহস করে তোমার পদমূলে
 আপনারে আজ ধরি নাই যে তুলে,
 পড়ে আছি মাটিতে মুখ রেখে
 ফিরিয়ে পাছে দাও এ আমার দান।

আপনি যদি আমার হাতে ধরে
 কাছে এসে উঠতে বল' মোরে
 তবে প্রাণের অসীম দরিদ্রতা
 এই নিমেষেই হবে অবসান ।

২২ জ্যৈষ্ঠ ১৩১৭
 বোলপুর

কথা ছিল এক-তরীতে কেবল তুমি আমি
 যাব অকারণে ভেসে কেবল ভেসে ;
 ত্রিভুবনে জানবে না কেউ আমরা তীর্থগামী
 কোথায় যেতেছি কোন্ দেশে সে কোন্ দেশে ।
 কূলহারা সেই সমুদ্র-মাঝখানে
 শোনার গান একলা তোমার কানে,
 চেউয়ের মতন ভাষা-বাঁধন-হারা
 আমার সেই রাগিণী শুনবে নীরব হেসে ।

আজ্ঞো সময় হয় নি কি তার, কাজ কি আছে বাকি ।
 ওগো ঐ-যে সঙ্ক্যা নামে সাগরতীরে ।
 মলিন আলোয় পাখা মেলে সিঙ্কুপারের পাখি
 আপন কুলায়-মাঝে সবাই এল ফিরে ।
 কখন তুমি আসবে ঘাটের 'পরে
 বাঁধনটুকু কেটে দেবার তরে ।
 অস্তরবির শেষ আলোটির মতো
 তরী নিশীথ-মাঝে যাবে নিরুদ্দেশে ।

৩০ জ্যৈষ্ঠ ১৩১৭
 বোলপুর

আমার একলা ঘরের আড়াল ভেঙে
 বিশাল ভবে
 প্রাণের রথে বাহির হতে
 পারব কবে ।
 প্রবল প্রেমে সবার মাঝে
 ফিরব ধ্যেয়ে সকল কাজে,
 হাটের পথে তোমার সাথে
 মিলন হবে ।
 প্রাণের রথে বাহির হতে
 পারব কবে ।

নিখিল আশা-আকাঙ্ক্ষা-ময়
 দুঃখে সুখে
 ঝাঁপ দিয়ে তার তরঙ্গপাত
 ধরব বুকে ।
 মন্দ-ভালোর আঘাতবেগে
 তোমার বুকে উঠব জেগে,
 শুনব বাণী বিশ্বজনের
 কলরবে ।
 প্রাণের রথে বাহির হতে
 পারব কবে ।

একা আমি ফিরব না আর

এমন করে—

নিজের মনে কোণে কোণে

মোহের ঘোরে ।

তোমায়

একলা বাহুর বাঁধন দিয়ে

ছোটো করে ঘিরতে গিয়ে

আপনাকে যে বাঁধি কেবল

আপন ডোরে ।

যখন আমি পাব তোমায়

নিখিলমাঝে

সেই খনে হৃদয়ে পাব

হৃদয়রাজে ।

এই চিত্ত আমার বৃন্ত কেবল,

তারি 'পরে বিশ্বকমল ;

তারি 'পরে পূর্ণ প্রকাশ

দেখাও মোরে ।

আমারে যদি জাগালে আজি, নাথ,
ফিরো না তবে ফিরো না, করো
করণ আঁখিপাত ।

নিবিড় বনশাখার 'পরে
আষাঢ়-মেঘে বৃষ্টি ঝরে,
বাদলভরা আলসভরে

ঘুমায়ে আছে রাত ।

ফিরো না তুমি ফিরো না, করো
করণ আঁখিপাত ।

বিরামহীন বিজুলিঘাতে
নিদ্রাহারা প্রাণ
বরষাজলধারার সাথে
গাহিতে চাহে গান ।

হৃদয় মোর চোখের জলে
বাহির হল তিমিরতলে,
আকাশ খোঁজে ব্যাকুল বলে
বাড়িয়ে ছুই হাত ।

ফিরো না তুমি ফিরো না, করো
করণ আঁখিপাত ।

ছিন্ন ক'রে লও হে মোরে,
 আর বিলম্ব নয় ।
 খুলায় পাছে ঝ'রে পড়ি
 এই জাগে মোর ভয় ।
 এ ফুল তোমার মালার মাঝে
 ঠাই পাবে কি জানি না যে,
 তবু তোমার আঘাতটি তার
 ভাগ্যে যেন রয় ।
 ছিন্ন করো, ছিন্ন করো,
 আর বিলম্ব নয় ।

কখন যে দিন ফুরিয়ে যাবে
 আসবে আঁধার ক'রে,
 কখন তোমার পূজার বেলা
 কাটবে অগোচরে ।
 যেটুকু এর রঙ ধরেছে,
 গন্ধে সুধায় বুক ভরেছে,
 তোমার সেবায় লও সেটুকু
 থাকতে সুসময় ।
 ছিন্ন করো, ছিন্ন করো,
 আর বিলম্ব নয় ।

চাই গো আমি তোমারে চাই,
 তোমায় আমি চাই—
 এই কথাটি সদাই মনে
 বলতে যেন পাই ।
 আর যা-কিছু বাসনাতে
 ঘুরে বেড়াই দিনে রাতে
 মিথ্যা সে-সব মিথ্যা, ওগো,
 তোমায় আমি চাই ।

রাত্রি যেমন লুকিয়ে রাখে
 আলোর প্রার্থনাই—
 তেমনি গভীর মোহের মাঝে
 তোমায় আমি চাই ।
 শাস্তিরে ঝড় যখন হানে
 শাস্তি তবু চায় সে প্রাণে,
 তেমনি তোমায় আঘাত করি
 তবু তোমায় চাই ।

৩ আষাঢ় ১৩১৭

আমার এ প্রেম নয় তো ভীক,
 নয় তো হীনবল,
 শুধু কি এ ব্যাকুল হয়ে
 ফেলবে অশ্রুজল ।
 মন্দমধুর সুখে শোভায়
 প্রেমকে কেন ঘুমে ডোবায় ।
 তোমার সাথে জাগতে সে চায়
 আনন্দে পাগল ।

নাচ' যখন ভীষণ সাজে
 তীব্র তালের আঘাত বাজে,
 পালায় ত্রাসে পালায় লাজে
 সন্দেহবিহ্বল ।
 সেই প্রচণ্ড মনোহরে
 প্রেম যেন মোর বরণ করে,
 ক্ষুদ্র আশার স্বর্গ তাহার
 দিক সে রসাতল ।

আরো আঘাত সহিবে আমার,
 সহিবে আমারো—
 আরো কঠিন সুরে জীবন-
 তারে ঝংকারো ।
 যে রাগ জাগাও আমার প্রাণে
 বাজে নি তা চরম তানে,
 নিষ্ঠুর মূর্ছনায় সে গানে
 মূর্তি সঞ্চারো ।

লাগে না গো কেবল যেন
 কোমল করুণা,
 মৃদু সুরের খেলায় এ প্রাণ
 ব্যর্থ কোরো না ।
 জ্বলে উঠুক সকল ছতাস,
 গর্জি উঠুক সকল বাতাস,
 জাগিয়ে দিয়ে সকল আকাশ
 পূর্ণতা বিস্তারো ।

এই করেছ ভালো, নিঠুর,
এই করেছ ভালো ।

এমনি করে হৃদয়ে মোর
তীব্র দহন জ্বালো ।

আমার এ ধূপ না পোড়ালে
গন্ধ কিছুই নাহি ঢালে,
আমার এ দীপ না জ্বালালে
দেয় না কিছুই আলো ।

যখন থাকে অচেতনে
এ চিন্ত আমার
আঘাত সে যে পরশ তব
সেই তো পুরস্কার ।

অন্ধকারে মোহে লাজে
চোখে তোমায় দেখি না যে,
বজ্রে তোলো আগুন ক'রে
আমার যত কালো ।

দেবতা জেনে দূরে রই দাঁড়ায়ে,
আপন জেনে আদর করি নে ।

পিতা বলে প্রণাম করি পায়ে,
বন্ধু বলে ছু হাত ধরি নে ।

আপনি তুমি অতি সহজ প্রেমে
আমার হয়ে এলে যেথায় নেমে
সেথায় সুখে বৃকের মধ্যে ধ'রে
সঙ্গী বলে তোমায় বরি নে ।

ভাই তুমি যে ভাইয়ের মাঝে, প্রভু,
তাদের পানে তাকাই না যে তবু,
ভাইয়ের সাথে ভাগ করে মোর ধন
তোমার মুঠা কেন ভরি নে ।

ছুটে এসে সবার সুখে ছুখে
দাঁড়াই নে তো তোমারই সম্মুখে,
সঁপিয়ে প্রাণ ক্লাস্তিবিহীন কাজে
প্রাণসাগরে ঝাঁপিয়ে পড়ি নে

তুমি যে কাজ করছ, আমায়
 সেই কাজে কি লাগাবে না ।
 কাজের দিনে আমায় তুমি
 আপন হাতে জাগাবে না ?
 ভালোমন্দ ওঠাপড়ায়
 বিশ্বশালার ভাঙাগড়ায়
 তোমার পাশে দাঁড়িয়ে যেন
 তোমার সাথে হয় গো চেনা ।

ভেবেছিলেম বিজন ছায়ায়
 নাই যেখানে আনাগোনা
 সন্ধ্যাবেলায় তোমায় আমায়
 সেথায় হবে জানাশোনা ।
 অন্ধকারে একা একা
 সে দেখা যে স্বপ্ন দেখা,
 ডাকো তোমার হাটের মাঝে
 চলছে যেথায় বেচাকেনা ।

বিশ্বসাথে যোগে যেথায় বিহার'
 সেইখানে যোগ তোমার সাথে আমারো ।
 নয়কো বনে, নয় বিজনে,
 নয়কো আমার আপন মনে,
 সবার যেথায় আপন তুমি হে প্রিয়
 সেথায় আপন আমারো ।

সবার পানে যেথায় বাহু পসার'
 সেইখানেতেই প্রেম জাগিবে আমারো ।
 গোপনে প্রেম রয় না ঘরে,
 আলোর মতো ছড়িয়ে পড়ে
 সবার তুমি আনন্দধন হে প্রিয়,
 আনন্দ সেই আমারো ।

৭ আষাঢ় ১৩১৭

ডাকো ডাকো ডাকো আমারে
তোমার স্নিগ্ধ শীতল গভীর
পবিত্র আঁধারে ।

তুচ্ছ দিনের ক্লাস্তি গ্রানি
দিতেছে জীবন ধূলাতে টানি
সারাক্ষণের বাক্যমনের
সহস্র বিকারে ।

মুক্ত করো হে মুক্ত করো আমারে,
তোমার নিবিড় নীরব উদার
অনন্ত আঁধারে ।

নীরব রাত্রে হারাইয়া বাক্
বাহির আমার বাহিরে মিশাক,
দেখা দিক মম অন্তরতম
অখণ্ড আকারে ।

৭ আষাঢ় ১৩১৭

যেথায় তোমার লুট হতেছে ভুবনে
সেইখানে মোর চিন্ত যাবে কেমনে ।

সোনার ঘটে সূর্য তারা
নিচ্ছে তুলে আলোর ধারা,
অনন্ত প্রাণ ছড়িয়ে পড়ে গগনে ।
সেইখানে মোর চিন্ত যাবে কেমনে ।

যেথায় তুমি বস' দানের আঁসনে
চিন্ত আমার সেথায় যাবে কেমনে ।
নিত্য নূতন রসে তেলে
আপনাকে যে দিচ্ছ মেলে,
সেথা কি ডাক পড়বে না গো জীবনে ।
সেইখানে মোর চিন্ত যাবে কেমনে ।

ফুলের মতন আপনি ফুটাও গান,
 হে আমার নাথ, এই তো তোমার দান ।
 ওগো, সে ফুল দেখিয়া আনন্দে আমি ভাসি
 আমার বলিয়া উপহার দিতে আসি,
 তুমি নিজ হাতে তারে তুলে লও স্নেহে হাসি—
 দয়া করে প্রভু রাখ' মোর অভিমান ।

তার পরে যদি পূজার বেলার শেষে
 এ গান ঝরিয়া ধরার ধূলায় মেশে
 তবে ক্ষতি কিছু নাই— তব করতলপুটে
 অজস্র ধন কত লুটে, কত টুটে,
 তারা আমার জীবনে ক্ষণকালতরে ফুটে
 চিরকালতরে সার্থক করে প্রাণ ।

৯ আষাঢ় ১৩১৭

মুখ ফিরায়ে রব তোমার পানে
 এই ইচ্ছাটি সফল কর প্রাণে ।
 কেবল থাকা, কেবল চেয়ে থাকা,
 কেবল আমার মনটি তুলে রাখা,
 সকল ব্যথা সকল আকাজক্ষায়
 সকল দিনের কাজেরই মাঝখানে ।

নানা ইচ্ছা ধায় নানা দিক -পানে,
 একটি ইচ্ছা সফল করো প্রাণে ।
 সেই ইচ্ছাটি রাতের পরে রাতে
 জাগে যেন একের বেদনাতে,
 দিনের পরে দিনকে যেন গাঁথে
 একের সূত্রে এক আনন্দগানে ।

১০ আষাঢ় ১৩১৭

আবার এসেছে আষাঢ় আকাশ ছেয়ে,
আসে বৃষ্টির সুবাস বাতাস বেয়ে ।

এই পুরাতন হৃদয় আমার আজি
পুলকে ছলিয়া উঠিছে আবার বাজি
নূতন মেঘের ঘনিমার পানে চেয়ে ।
আবার এসেছে আষাঢ় আকাশ ছেয়ে ।

রহিয়া রহিয়া বিপুল মাঠের 'পরে
নব তৃণদলে বাদলের ছায়া পড়ে ।
'এসেছে এসেছে' এই কথা বলে প্রাণ,
'এসেছে এসেছে' উঠিতেছে এই গান,
নয়নে এসেছে, হৃদয়ে এসেছে ধেয়ে ।
আবার আষাঢ় এসেছে আকাশ ছেয়ে ।

১০ আষাঢ় ১৩১৭

আজ বরষার রূপ হেরি মানবের মাঝে ;
 চলেছে গরজি, চলেছে নিবিড় সাজে
 হৃদয়ে তাহার নাচিয়া উঠিছে ভীমা,
 ধাইতে ধাইতে লোপ ক'রে চলে সীমা,
 কোন্ তাড়নায় মেঘের সহিত মেঘে
 বন্ধে বন্ধে মিলিয়া বজ্র বাজে ।
 বরষার রূপ হেরি মানবের মাঝে ।

পুঞ্জ পুঞ্জ দূর সুদূরের পানে
 দলে দলে চলে, কেন চলে নাহি জানে ।
 জানে না কিছুই কোন্ মহাদ্রিতলে
 গভীর শ্রাবণে গলিয়া পড়িবে জলে,
 নাহি জানে তার ঘনঘোর সমারোহে
 কোন্ সে ভীষণ জীবনমরণ রাজে ।
 বরষার রূপ হেরি মানবের মাঝে ।

ঈশান কোণেতে ওই-যে ঝড়ের বাণী
 গুরু গুরু রবে কী করিছে কানাকানি
 দিগন্তুরালে কোন্ ভবিতব্যতা
 স্তব্ধ তিমিরে বহে ভাষাহীন ব্যথা,
 কালো কল্পনা নিবিড় ছায়ার তলে
 ঘনায় উঠিছে কোন্ আসন্ন কাজে ।
 বরষার রূপ হেরি মানবের মাঝে ।

হে মোর দেবতা, ভরিয়া এ দেহ প্রাণ
কী অমৃত তুমি চাহ করিবারে পান ।

আমার নয়নে তোমার বিশ্বছবি
দেখিয়া লইতে সাধ যায় তব কবি—

আমার মুগ্ধ শ্রবণে নীরব রহি

শুনিয়া লইতে চাহ আপনার গান ।

হে মোর দেবতা, ভরিয়া এ দেহ প্রাণ
কী অমৃত তুমি চাহ করিবারে পান ।

আমার চিত্তে তোমার সৃষ্টিখানি
রচিয়া তুলিছে বিচিত্র এক বাণী ।

তারি সাথে, প্রভু, মিলিয়া তোমার শ্রীতি
জাগায়ে তুলিছে আমার সকল গীতি,
আপনারে তুমি দেখিছ মধুর রসে

আমার মাঝারে নিজেই করিয়া দান

হে মোর দেবতা, ভরিয়া এ দেহ প্রাণ
কী অমৃত তুমি চাহ করিবারে পান ।

এই মোর সাধ যেন এ জীবনমাঝে
 তব আনন্দ মহাসংগীতে বাজে ।
 তোমার আকাশ, উদার আলোকধারা,
 দ্বার ছোটো দেখে ফেরে না যেন গো তারা—
 ছয় ঋতু যেন সহজ নৃত্যে আসে
 অস্তুরে মোর নিত্য নূতন সাজে ।

তব আনন্দ আমার অঙ্গে মনে
 বাধা যেন নাহি পায় কোনো আবরণে ।
 তব আনন্দ পরম দুঃখে মম
 জ্বলে উঠে যেন পুণ্য-আলোক-সম,
 তব আনন্দ দীনতা চূর্ণ করি
 ফুটে উঠে ফেটে আমার সকল কাজে ।

১৩ আষাঢ় ১৩১৭

একলা আমি বাহির হলেম
 তোমার অভিসারে,
 সাথে সাথে কে চলে মোর
 নীরব অঙ্ককারে ।
 ছাড়াতে চাই অনেক করে,
 ঘুরে চলি, যাই যে সরে,
 মনে করি আপদ গেছে—
 আবার দেখি তারে

ধরণী সে কাঁপিয়ে চলে,
 বিষম চঞ্চলতা ।
 সকল কথার মধ্যে সে চায়
 কইতে আপন কথা ।
 সে যে আমার আমি, প্রভু,
 লজ্জা তাহার নাই যে কভু,
 তারে নিয়ে কোন্ লাজে বা
 যাব তোমার দ্বারে ।

আমি চেয়ে আছি তোমাদের সবাপানে ।

স্থান দাও মোরে সকলের মাঝখানে ।

নীচে সব-নীচে এ ধুলির ধরণীতে

যেথা আসনের মূল্য না হয় দিতে,

যেথা রেখা দিয়ে ভাগ করা নেই কিছু,

যেথা ভেদ নাই মানে আর অপমানে,

স্থান দাও সেথা সকলের মাঝখানে ।

যেথা বাহিরের আবরণ নাহি রয়,

যেথা আপনার উলঙ্গ পরিচয়,

আমার বলিয়া কিছু নাই একেবারে

এ সত্য যেথা নাহি ঢাকে আপনারে,

সেথায় দাঁড়ায়ে নিলাজ দৈন্য মম

ভরিয়া লইব তাঁহার পরম দানে ।

স্থান দাও মোরে সকলের মাঝখানে ।

১৫ আষাঢ় ১৩১৭

আর আমায় আমি নিজের শিরে
বইব না।

আর নিজের দ্বারে কাঙাল হয়ে
রইব না।

এই বোঝা তোমার পায়ে ফেলে
বেরিয়ে পড়ব অবহেলে—
কোনো খবর রাখব না ওর,
কোনো কথাই কইব না।
আমায় আমি নিজের শিরে
বইব না।

বাসনা মোর যারেই পরশ
করে সে

আলোটি তার নিবিয়ে ফেলে
নিমেষে।

ওরে, সেই অশুচি ছুই হাতে তার
যা এনেছে চাই নে সে আর,
তোমার প্রেমে বাজবে না যা
সে আর আমি সইব না।
আমায় আমি নিজের শিরে
বইব না।

হে মোর চিন্ত, পুণ্য তীর্থে
 জাগো রে ধীরে—
 এই ভারতের মহামানবের
 সাগরতীরে ।

হেথায় দাঁড়ায়ে ছু বাহু বাড়ায়ে
 নমি নরদেবতারে,
 উদার ছন্দে পরমানন্দে
 বন্দন করি তাঁরে ।
 ধ্যানগম্ভীর এই-যে ভূধর,
 নদীজপমালাধৃত প্রাস্তুর,
 হেথায় নিত্য হেরো পবিত্র
 ধরিত্রীরে
 এই ভারতের মহামানবের
 সাগরতীরে ।

কেহ নাহি জানে কার আস্থানে
 কত মানুষের ধারা
 ছুঁবার স্রোতে এল কোথা হতে
 সমুদ্রে হল হারা ।

হেথায় আর্ষ, হেথা অনাৰ্ষ,
 হেথায় দ্রাবিড় চীন—

শকছনদল পাঠান মোগল

এক দেহে হল লীন ।

পশ্চিম আজি খুলিয়াছে দ্বার,
সেথা হতে সবে আনে উপহার,
দিবে আর নিবে, মিলাবে মিলিবে,
যাবে না ফিরে—

এই ভারতের মহামানবের
সাগরতীরে ।

রগধারা বাহি জয়গান গাহি

উন্মাদ কলরবে

ভেদি মরুপথ গিরিপর্বত

যারা এসেছিল সবে,

তারা মোর মাঝে সবাই বিরাজে
কেহ নহে নহে দূর,

আমার শোণিতে রয়েছে ধ্বনিতে
তারি বিচিত্র সুর ।

হে রুদ্রবীণা, বাজো বাজো বাজো,
ঘৃণা করি দূরে আছে যারা আজও
বন্ধ নাশিবে, তারাও আসিবে,

দাঁড়াবে ঘিরে

এই ভারতের মহামানবের
সাগরতীরে ।

হেথা একদিন বিরামবিহীন

মহা গুংকারধ্বনি

হৃদয়তন্ত্রে একের মস্ত্রে

উঠেছিল রনরনি ।

তপস্শাবলে একের অনলে

বহুরে আছতি দিয়া

বিভেদ তুলিল, জাগায়ে তুলিল

একটি বিরাট হিয়া ।

সেই সাধনার সে আরাধনার

যজ্ঞশালার খোলা আজি দ্বার,

হেথায় সবারে হবে মিলিবারে

আনতশিরে

এই ভারতের মহামানবের

সাগরতীরে ।

সেই হোমানলে হেরো আজি জ্বলে

দুখের রক্ত শিখা ।

হবে তা সহিতে, মর্মে দহিতে—

আছে সে ভাগ্যে লিখা ।

এ দুখবহন করো মোর মন,

শোনো রে একের ডাক ।

যত লাজ ভয় করো করো জয়,

অপমান দূরে যাক ।

ছঃসহ ব্যথা হয়ে অবসান
জন্ম লাভিবে কী বিশাল প্রাণ ।
পোহায় রজনী, জাগিছে জননী
বিপুল নীড়ে
এই ভারতের মহামানবের
সাগরতীরে ।

এসো হে আর্য এসো অনার্য,
হিন্দু মুসলমান ।

এসো এসো আজ তুমি ইংরাজ,
এসো এসো খৃস্টান ।

এসো ব্রাহ্মণ, শুচি করি মন
ধরো হাত সবাকার ।

এসো হে পতিত, করো অপনীত
সব অপমানভার ।

মার অভিষেকে এসো এসো ত্বরা,
মঙ্গলঘট হয় নি যে ভরা

সবার-পরশে-পবিত্র-করা

তীর্থনীরে

আজি ভারতের মহামানবের
সাগরতীরে ।

যেথায় থাকে সবার অধম দীনের হতে দীন
 সেইখানে যে চরণ তোমার রাজে
 সবার পিছে, সবার নীচে,
 সব-হারাদের মাঝে ।
 যখন তোমায় প্রণাম করি আমি
 প্রণাম আমার কোন্‌খানে যায় থামি—
 তোমার চরণ যেথায় নামে অপমানের তলে
 সেথায় আমার প্রণাম নামে না যে
 সবার পিছে, সবার নীচে,
 সব-হারাদের মাঝে ।

অহংকার তো পায় না নাগাল যেথায় তুমি ফের'
 রিক্তভূষণ দীনদরিদ্র সাজে
 সবার পিছে, সবার নীচে,
 সব-হারাদের মাঝে ।
 ধনে মানে যেথায় আছে ভরি
 সেথায় তোমার সঙ্গ আশা করি—
 সঙ্গী হয়ে আছি যেথায় সঙ্গীহীনের ঘরে
 সেথায় আমার হৃদয় নামে না যে
 সবার পিছে, সবার নীচে,
 সব-হারাদের মাঝে ।

হে মোর দুর্ভাগা দেশ, যাদের করেছ অপমান
অপমানে হতে হবে তাহাদের সবার সমান ।

মানুষের অধিকারে
বঞ্চিত করেছ যারে,

সম্মুখে দাঁড়িয়ে রেখে তবু কোলে দাও নাই স্থান,
অপমানে হতে হবে তাহাদের সবার সমান ।

মানুষের পরশেরে প্রতিদিন ঠেকাইয়া দূরে
ঘৃণা করিয়াছ তুমি মানুষের প্রাণের ঠাকুরে ।

বিধাতার রুদ্ররোষে
দুর্ভিক্ষের দ্বারে ব'সে

ভাগ করে খেতে হবে সকলের সাথে অন্নপান ।
অপমানে হতে হবে তাহাদের সবার সমান ।

তোমার আসন হতে যেথায় তাদের দিলে ঠেলে
সেথায় শক্তিরে তব নির্বাসন দিলে অবহেলে ।

চরণে দলিত হয়ে

ধুলায় সে যায় বয়ে—

সেই নিম্নে নেমে এসো, নহিলে নাহি রে পরিত্রাণ ।
অপমানে হতে হবে আজি তোরে সবার সমান ।

যারে তুমি নীচে ফেল' সে তোমারে বাঁধিবে যে নীচে,
পশ্চাতে রেখেছ যারে সে তোমারে পশ্চাতে টানিছে ।

অজ্ঞানের অন্ধকারে
আড়ালে ঢাকিছ যারে
তোমার মঙ্গল ঢাকি গড়িছে সে ঘোর ব্যবধান ।
অপমানে হতে হবে তাহাদের সবার সমান ।

শতক শতাব্দী ধরে নামে শিরে অসম্মানভার,
মানুষের নারায়ণে তবুও কর না নমস্কার ।

তবু নত করি আঁখি
দেখিবারে পাও না কি
নেমেছে ধুলার তলে হীন-পতিতের ভগবান ।
অপমানে হতে হবে সেথা তোরে সবার সমান ।

দেখিতে পাও না তুমি মৃত্যুদূত দাঁড়ায়েছে দ্বারে,
অভিশাপ আঁকি দিল তোমার জাতির অহংকারে ।

সবারে না যদি ডাক',
এখনো সরিয়া থাক',
আপনারে বেঁধে রাখ' চৌদিকে জড়ায়ে অভিমান—
মৃত্যুমাঝে হবে তবে চিতাভস্মে সবার সমান ।

২০ আষাঢ় ১৩১৭

ছাড়িস নে, ধরে থাক্ এঁটে,
 ওরে, হবে তোর জয় ।
 অন্ধকার যায় বুঝি কেটে,
 ওরে, আর নেই ভয় ।
 ঐ দেখ্ পূর্বাশার ভালে
 নিবিড় বনের অন্তরালে
 শুকতারা হয়েছে উদয় ।
 ওরে, আর নেই ভয় ।

এরা যে কেবল নিশাচর—
 অবিশ্বাস আপনার 'পর,
 নিরাশ্বাস, আলস্য, সংশয়,
 এরা প্রভাতের নয় ।
 ছুটে আয়, আয় রে বাহিরে—
 চেয়ে দেখ্, দেখ্ উর্ধ্বশিরে,
 আকাশ হতেছে জ্যোতির্ময়
 ওরে, আর নেই ভয় ।

আছে আমার হৃদয় আছে ভরে,
 এখন তুমি যা খুশি তাই করো ।
 এমনি যদি বিরাজ' অন্তরে
 বাহির হতে সকলি মোর হরো ।
 সব পিপাসার যেথায় অবসান
 সেথায় যদি পূর্ণ কর প্রাণ,
 তাহার পরে মরুপথের মাঝে
 উঠে রৌদ্র উঠুক খরতর ।

এই-যে খেলা খেলছ কত ছলে
 এই খেলা তো আমি ভালোবাসি ।
 এক দিকেতে ভাসাও আঁখিজলে,
 আরেক দিকে জাগিয়ে তোল' হাসি ।
 যখন ভাবি সব খোয়ালেম বুঝি
 গভীর করে পাই তাহারে খুঁজি,
 কোলের থেকে যখন ফেল' দূরে
 বুকের মাঝে আবার তুলে ধর' ।

২১ আষাঢ় ১৩১৭
 রেলপথ । ই.আই.আর.

গর্ব করে নিই নে ও নাম, জান অস্তুর্ধামী—
 আমার মুখে তোমার নাম কি সাজে ।
 যখন সবাই উপহাসে তখন ভাবি আমি,
 আমার কণ্ঠে তোমার নাম কি বাজে ।
 তোমা হতে অনেক দূরে থাকি
 সে যেন মোর জানতে না রয় বাকি—
 নামগানের এই ছদ্মবেশে দিই পরিচয় পাছে
 মনে মনে মরি যে সেই লাজে ।

অহংকারের মিথ্যা হতে বাঁচাও দয়া করে,
 রাখো আমায় যেথা আমার স্থান ।
 আর-সকলের দৃষ্টি হতে সরিয়ে দিয়ে মোরে
 করো তোমার নত নয়ন দান ।
 আমার পূজা দয়া পাবার তরে,
 মান যেন সে না পায় কারো ঘরে—
 নিত্য তোমায় ডাকি আমি ধুলার 'পরে বসে
 নিত্যনূতন অপরাধের মাঝে ।

২২ আষাঢ় ১৩১৭
 রেলপথ । ই.বি.এস.আর.

কে বলে সব ফেলে যাবি
 মরণ হাতে ধরবে যবে—
 জীবনে তুই যা নিয়েছিস
 মরণে সব নিতে হবে ।
 এই ভরা ভাঙারে এসে
 শূন্য কি তুই যাবি শেষে ।
 নেবার মতো যা আছে তোর
 ভালো করে নে তুই তবে ।

আবর্জনার অনেক বোঝা
 জমিয়েছিস যে নিরবধি,
 বেঁচে যাবি, যাবার বেলা
 ক্ষয় করে সব ঘাস রে যদি ।
 এসেছি এই পৃথিবীতে,
 হেথায় হবে সেজে নিতে—
 রাজার বেশে চল রে হেসে
 মৃত্যুপারের সে উৎসবে ।

২৫ আষাঢ় ১৩১৭
 শিলাইদহ

নদীপারের এই আষাঢ়ের
 প্রভাতখানি
 নে রে, ও মন, নে রে আপন
 প্রাণে টানি ।
 সবুজ নীলে সোনায় মিলে
 যে সুধা এই ছড়িয়ে দিলে,
 জাগিয়ে দিলে আকাশতলে
 গভীর বাণী,
 নে রে, ও মন, নে রে আপন
 প্রাণে টানি ।

এমনি করে চলতে পথে
 ভবের কূলে
 ছুই ধারে যা ফুল ফুটে সব
 নিস রে তুলে ।
 সেগুলি তোর চেতনাতে
 গেঁথে তুলিস দিবস-রাতে
 প্রতি দিনটি যতন ক'রে
 ভাগ্য মানি—
 নে রে, ও মন, নে রে আপন
 প্রাণে টানি ।

মরণ যেদিন দিনের শেষে
 আসবে তোমার ছুয়ারে
 সেদিন তুমি কী ধন দিবে উহারে ।
 ভরা আমার পরানখানি
 সম্মুখে তার দিব আনি,
 শূন্য বিদায় করব না তো উহারে—
 মরণ যেদিন আসবে আমার ছুয়ারে ।

কত শরৎ-বসন্ত-রাত,
 কত সন্ধ্যা, কত প্রভাত
 জীবনপাত্রে কত যে রস বরষে—
 কতই ফলে কতই ফুলে
 হৃদয় আমার ভরি তুলে
 ছঃখসুখের আলোছায়ার পরশে ।

যা-কিছু মোর সঞ্চিত ধন
 এতদিনের সব আয়োজন
 চরম দিনে সাজিয়ে দিব উহারে—
 মরণ যেদিন আসবে আমার ছুয়ারে

২৫ আষাঢ় ১৩১৭
 শিলাইদহ

দয়া ক'রে, ইচ্ছা ক'রে, আপনি ছোটো হয়ে
 এসো তুমি এ ক্ষুদ্র আলয়ে ।
 তাই তোমার মাধুর্যসুধা
 ঘুচায় আমার আঁখির ক্ষুধা,
 জলে স্থলে দাও যে ধরা
 কত আকার লয়ে ।

বন্ধু হয়ে, পিতা হয়ে, জননী হয়ে,
 আপনি তুমি ছোটো হয়ে এসো হৃদয়ে ।
 আমিও কি আপন হাতে
 করব ছোটো বিশ্বনাথে—
 জানাব আর জানব তোমায়
 ক্ষুদ্র পরিচয়ে ?

২৬ আষাঢ় ১৩১৭
 শিলাইদহ

ওগো আমার এই জীবনের
 শেষ পরিপূর্ণতা
 মরণ, আমার মরণ, তুমি
 কও আমারে কথা ।
 সারা জনম তোমার লাগি
 প্রতিদিন যে আছি জাগি,
 তোমার তরে বহে বেড়াই
 দুঃখসুখের ব্যথা ।
 মরণ, আমার মরণ, তুমি
 কও আমারে কথা ।

যা পেয়েছি, যা হয়েছি,
 যা-কিছু মোর আশা,
 না জেনে ধায় তোমার পানে
 সকল ভালোবাসা ।
 মিলন হবে তোমার সাথে
 একটি শুভ দৃষ্টিপাতে,
 জীবনবধু হবে তোমার
 নিত্য-অনুগতা ।
 মরণ, আমার মরণ, তুমি
 কও আমারে কথা ।

বরণমালা গাঁথা আছে
আমার চিত্তমাঝে,
কবে নীরব হাশুমুখে
আসবে বরের সাজে ।
সেদিন আমার রবে না ঘর,
কেই-বা আপন, কেই-বা অপর,
বিজন রাতে পতির সাথে
মিলবে পতিব্রতা ।
মরণ, আমার মরণ, তুমি
কও আমারে কথা ।

২৬ আষাঢ় ১৩১৭
শিলাইদহ

যাত্রী আমি ওরে ।

পারবে না কেউ রাখতে আমায় ধরে ।

দুঃখসুখের বাঁধন সবই মিছে,

বাঁধা এ ঘর রইবে কোথায় পিছে—

বিষয়-বোঝা টানে আমায় নীচে,

ছিন্ন হয়ে ছড়িয়ে যাবে পড়ে ।

যাত্রী আমি ওরে ।

চলতে পথে গান গাহি প্রাণ ভরে ।

দেহদুর্গে খুলবে সকল দ্বার,

ছিন্ন হবে শিকল বাসনার,

ভালোমন্দ কাটিয়ে হব পার,

চলতে রব লোকে লোকান্তরে ।

যাত্রী আমি ওরে ।

যা-কিছু ভার যাবে সকল সরে ।

আকাশ আমায় ডাকে দূরের পানে

ভাষাবিহীন অজানিতের গানে,

সকাল-সাঁঝে পরান মম টানে

কাহার বাঁশি এমন গভীর স্বরে ।

যাত্রী আমি ওরে ।
বাহির হলেম না জানি কোন্ ভোরে ।
তখন কোথাও গায় নি কোনো পাখি,
কী জানি রাত কতই ছিল বাকি,
নিমেষ-হারা শুধু একটি আঁখি
জেগে ছিল অন্ধকারের 'পরে ।

যাত্রী আমি ওরে ।
কোন্ দিনান্তে পৌঁছব কোন্ ঘরে ।
কোন্ তারকা দীপ জ্বালে সেইখানে,
বাতাস কাঁদে কোন্ কুসুমের ঘ্রাণে,
কে গো সেথায় স্নিগ্ধ ছু'নয়ানে
অনাদিকাল চাহে আমার তরে ।

২৬ আষাঢ় ১৩১৭
গোরাই নদী

উড়িয়ে ধ্বজা অভভেদী রথে
 ঐ-যে তিনি, ঐ-যে বাহির পথে ।
 আয় রে ছুটে, টানতে হবে রশি—
 ঘরের কোণে রইলি কোথায় বসি ।
 ভিড়ের মধ্যে ঝাঁপিয়ে পড়ে গিয়ে
 ঠাই করে তুই নে রে কোনোমতে ।

কোথায় কী তোর আছে ঘরের কাজ
 সে-সব কথা ভুলতে হবে আজ ।
 টান্ রে দিয়ে সকল চিত্তকায়া,
 টান্ রে ছেড়ে তুচ্ছ প্রাণের মায়া,
 চল্ রে টেনে আলোয় অন্ধকারে
 নগর-গ্রামে অরণ্যে পর্বতে ।

ঐ-যে চাকা ঘুরছে ঝনঝনি,
 বুকের মাঝে শুনছ কি সেই ধ্বনি ।
 রক্তে তোমার ছলছে না কি প্রাণ ।
 গাইছে না মন মরণজয়ী গান ?
 আকাজক্ষা তোর বন্যাবেগের মতো
 ছুটছে না কি বিপুল ভবিষ্যতে ।

২৬ আষাঢ় ১৩১৭
 গোরাই

ভজন পূজন সাধন আরাধনা
 সমস্ত থাক্ পড়ে ।
 রুদ্ধদ্বারে দেবালয়ের কোণে
 কেন আছিস ওরে ।
 অন্ধকারে লুকিয়ে আপন মনে
 কাহারে তুই পূজিস সংগোপনে,
 নয়ন মেলে দেখ্ দেখি তুই চেয়ে—
 দেবতা নাঈ ঘরে ।

তিনি গেছেন যেথায় মাটি ভেঙে
 করছে চাষা চাষ—
 পাথর ভেঙে কাটছে যেথায় পথ,
 খাটছে বারো মাস ।
 রৌদ্রে জলে আছেন সবার সাথে,
 ধূলা তাঁহার লেগেছে ছুই হাতে ;
 তাঁরই মতন শুচি বসন ছাড়ি
 আয় রে ধুলার 'পরে ।

মুক্তি ? ওরে, মুক্তি কোথায় পাবি,
 মুক্তি কোথায় আছে ।
 আপনি প্রভু সৃষ্টিবাঁধন প'রে
 বাঁধা সবার কাছে ।

রাখো রে ধ্যান, থাক্ রে ফুলের ডালি,
ছিড়ুক বস্ত্র, লাগুক ধূলাবালি,
কর্মযোগে তাঁর সাথে এক হয়ে
ঘর্ম পড়ুক ঝরে

২৭ আষাঢ় ১৩১৭
কয়া। গোরাই

সীমার মাঝে, অসীম, তুমি
 বাজাও আপন সুর ।
 আমার মধ্যে তোমার প্রকাশ
 তাই এত মধুর ।
 কত বর্ণে কত গন্ধে
 কত গানে কত ছন্দে,
 অরূপ, তোমার রূপের লীলায়
 জাগে হৃদয়পুর ।
 আমার মধ্যে তোমার শোভা
 এমন সুমধুর ।

তোমায় আমায় মিলন হলে
 সকলি যায় খুলে—
 বিশ্বসাগর ঢেউ খেলায়ে
 উঠে তখন ছলে ।
 তোমার আলোয় নাই তো ছায়া,
 আমার মাঝে পায় সে কায়া,
 হয় সে আমার অশ্রুজলে
 সুন্দর বিধুর ।
 আমার মধ্যে তোমার শোভা
 এমন সুমধুর ।

২৭ আষাঢ় ১৩১৭
 গোরাই । জানিপুর

তাই তোমার আনন্দ আমার 'পর,
 তুমি তাই এসেছ নীচে—
 আমায় নইলে, ত্রিভুবনেশ্বর,
 তোমার প্রেম হত যে মিছে ।
 আমায় নিয়ে মেলেছ এই মেলা,
 আমার হিয়ায় চলছে রসের খেলা,
 মোর জীবনে বিচিত্ররূপ ধ'রে
 তোমার ইচ্ছা তরঙ্গিছে ।

তাই তো তুমি রাজার রাজা হয়ে
 তবু আমার হৃদয় লাগি
 ফিরছ কত মনোহরণ বেশে—
 প্রভু, নিত্য আছ জাগি ।
 তাই তো, প্রভু, হেথায় এল নেমে
 তোমারি প্রেম ভক্তপ্রাণের প্রেমে,
 মূর্তি তোমার যুগলসম্মিলনে
 সেথায় পূর্ণ প্রকাশিছে ।

২৮ আষাঢ় ১৩১৭
 জানিপুর । গোরাই

মানের আসন, আরামশয়ন
 নয় তো তোমার তরে
 সব ছেড়ে আজ খুশি হয়ে
 চলো পথের 'পরে ।
 এসো, বন্ধু, তোমরা সবে
 একসাথে সব বাহির হবে,
 আজকে যাত্রা করব মোরা
 অমানিতের ঘরে ।

নিন্দা পরব ভূষণ ক'রে,
 কাঁটার কণ্ঠহার ;
 মাথায় করে তুলে লব
 অপমানের ভার ।
 দুঃখীর শেষ আলায় যেথা
 সেই ধুলাতে লুটাই মাথা,
 ত্যাগের শূন্যপাত্রটি নিই
 আনন্দরস ভ'রে ।

২৯ আষাঢ় ১৩১৭
 গোরাই

প্রভুগৃহ হতে আসিলে যেদিন
বীরের দল
সেদিন কোথায় ছিল যে লুকানো
বিপুল বল ।

কোথায় বর্ম, অস্ত্র কোথায়,
ক্ষীণ দরিদ্র অতি অসহায়,
চারি দিক হতে এসেছে আঘাত
অনর্গল—

প্রভুগৃহ হতে আসিলে যেদিন
বীরের দল ।

প্রভুগৃহমাবে ফিরিলে যেদিন
বীরের দল
সেদিন কোথায় লুকালো আবার
বিপুল বল ।

ধনু শর অসি কোথা গেল খসি,
শান্তির হাসি উঠিল বিকশি ;
চলে গেলে রাখি সারা জীবনের
সকল ফল—

প্রভুগৃহমাবে ফিরিলে যেদিন
বীরের দল ।

ভেবেছিলুম মনে যা হবার তারি শেষে
 যাত্রা আমার বুঝি খেমে গেছে এসে ।
 নাই বুঝি পথ, নাই বুঝি আর কাজ,
 পাথের যা ছিল ফুরিয়েছে বুঝি আজ,
 যেতে হবে স'রে নীরব অন্তরালে
 জীর্ণ জীবনে ছিন্ন মলিন বেশে ।

কী নিরখি আজি, একি অফুরান লীলা—
 একি নবীনতা বহে অন্তঃশীলা ।
 পুরাতন ভাষা মরে এল যবে মুখে
 নবগান হয়ে গুমরি উঠিল বুকে,
 পুরাতন পথ শেষ হয়ে গেল যেথা
 সেথায় আমারে আনিলে নূতন দেশে ।

৩১ আষাঢ় ১৩১৭
 কলিকাতা । ঠিকাগাড়িতে

আমার এ গান ছেড়েছে তার
 সকল অলংকার,
 তোমার কাছে রাখে নি আর
 সাজের অহংকার ।
 অলংকার যে মাঝে পড়ে
 মিলনেতে আড়াল করে,
 তোমার কথা চাকে যে তার
 মুখর ঝংকার ।

তোমার কাছে খাটে না মোর
 কবির গরব করা—
 মহাকবি, তোমার পায়ে
 দিতে চাই যে ধরা ।
 জীবন লয়ে যতন করি'
 যদি সরল বাঁশি গড়ি,
 আপন সুরে দিবে ভরি
 সকল ছিদ্র তার ।

১ শ্রাবণ ১৩১৭
 কলিকাতা

১২৬

নিন্দা হুঃখে অপমানে
যত আঘাত খাই
তবু জানি, কিছুই সেথা
হারাবার তো নাই ।
থাকি যখন ধুলার 'পরে
ভাবতে না হয় আসন-তরে,
দৈন্যমাঝে অসংকোচে
প্রসাদ তব চাই ।

লোকে যখন ভালো বলে,
যখন সুখে থাকি,
জানি মনে, তাহার মাঝে
অনেক আছে ফাঁকি ।
সেই ফাঁকিরে সাজিয়ে লয়ে
ঘুরে বেড়াই মাথায় বয়ে,
তোমার কাছে যাব এমন
সময় নাহি পাই ।

২ শ্রাবণ ১৩১৭
বোলপুর

রাজার মতো বেশে তুমি সাজাও যে শিশুরে,
 পরাও যারে মণিরতন-হার—
 খেলাধুলা আনন্দ তার সকলই যায় ঘুরে,
 বসন-ভূষণ হয় যে বিষম ভার ।
 ছেঁড়ে পাছে আঘাত লাগি,
 পাছে ধুলায় হয় সে দাগি,
 আপনাকে তাই সরিয়ে রাখে সবার হতে দূরে,
 চলতে গেলে ভাবনা ধরে তার—
 রাজার মতো বেশে তুমি সাজাও যে শিশুরে,
 পরাও যারে মণিরতন-হার ।

কী হবে, মা, অমন-তরো রাজার মতো সাজে,
 কী হবে ঐ মণিরতন-হারে ।
 ছয়ার খুলে দাও যদি তো ছুটি পথের মাঝে
 রৌদ্রবায়ু-ধুলাকাদার পাড়ে ।
 যেথায় বিশ্বজনের মেলা,
 সমস্ত দিন নানান খেলা,
 চারি দিকে বিরাট গাথা বাজে হাজার সুরে,
 সেথায় সে যে পায় না অধিকার—
 রাজার মতো বেশে তুমি সাজাও যে শিশুরে,
 পরাও যারে মণিরতন-হার ।

২ শ্রাবণ ১৩১৭
 বোলপুর

জড়িয়ে গেছে সরু মোটা
 ছুটো তারে,
 জীবন-বীণা ঠিক সুরে তাই
 বাজে না রে ।

এই বেসুরো জটিলতায়
 পরান আমার মরে ব্যথায়,
 হঠাৎ আমার গান থেমে যায়
 বারে বারে ।

জীবন-বীণা ঠিক সুরে আর
 বাজে না রে ।

এই বেদনা বহিতে আমি
 পারি না যে,
 তোমার সন্টার পথে এসে
 মরি লাজে ।

তোমার যারা গুণী আছে
 বসতে নারি তাদের কাছে,
 দাঁড়িয়ে থাকি সবার পাছে
 বাহির-দ্বারে ।

জীবন-বীণা ঠিক সুরে আর
 বাজে না রে ।

৩ শ্রাবণ ১৩১৭
 বোলপুর

গাবার মতো হয় নি কোনো গান,
দেবার মতো হয় নি কিছু দান ।

মনে যে হয় সবই রইল বাকি,
তোমায় শুধু দিয়ে এলেম ফাঁকি,
কবে হবে জীবন পূর্ণ ক'রে
এই জীবনের পূজা অবসান ।

আর-সকলের সেবা করি যত
প্রাণপণে দিই অর্ঘ্য ভরি ভরি—
সত্য মিথ্যা সাজিয়ে দিই যে কত
দীন বলিয়া পাছে ধরা পড়ি ।
তোমার কাছে গোপন কিছু নাই,
তোমার পূজায় সাহস এত তাই,
যা আছে তাই পায়ের কাছে আনি
অনাবৃত দরিদ্র এই প্রাণ ।

৭ শ্রাবণ ১৩১৭

১৩০

আমার মাঝে তোমার লীলা হবে,
তাই তো আমি এসেছি এই ভবে ।
এই ঘরে সব খুলে যাবে দ্বার,
ঘুচে যাবে সকল অহংকার,
আনন্দময় তোমার এ সংসারে
আমার কিছু আর বাকি না রবে ।

ম'রে গিয়ে বাঁচব আমি, তবে
আমার মাঝে তোমার লীলা হবে ।
সব বাসনা যাবে আমার থেমে
মিলে গিয়ে তোমারি এক প্রেমে,
দুঃখসুখের বিচিত্র জীবনে
তুমি ছাড়া আর কিছু না রবে ।

৭ শ্রাবণ ১৩১৭

দুঃস্বপন কোথা হতে এসে
 জীবনে বাধায় গণ্ডগোল ।
 কেঁদে উঠে জেগে দেখি শেষে,
 কিছু নাই, আছে মার কোল ।
 ভেবেছিলু আর-কেহ বুঝি,
 ভয়ে তাই প্রাণপণে যুঝি,
 তব হাসি দেখে আজ বুঝি
 তুমিই দিয়েছ মোরে দোল ।

এ জীবন সদা দেয় নাড়া
 লয়ে তার সুখ দুখ ভয়—
 কিছু যেন নাই গো সে ছাড়া,
 সেই যেন মোর সমুদয় ।
 এ ঘোর কাটিয়া যাবে চোখে
 নিমেষেই প্রভাত-আলোকে,
 পরিপূর্ণ তোমার সম্মুখে
 থেমে যাবে সকল কল্লোল ।

১৩২

গান দিয়ে যে তোমায় খুঁজি
বাহির-মনে
চিরদিবস মোর জীবনে ।
নিয়ে গেছে গান আমারে
ঘরে ঘরে দ্বারে দ্বারে,
গান দিয়ে হাত বুলিয়ে বেড়াই
এই ভুবনে ।

কত শেখা সেই শেখালো,
কত গোপন পথ দেখালো,
চিনিয়ে দিল কত তারা
হৃদগগনে ।

বিচিত্র সুখদুখের দেশে
রহস্যলোক ঘুরিয়ে শেষে
সন্ধ্যাবেলায় নিয়ে এল
কোন ভবনে ।

৩ শ্রাবণ ১৩১৭

তোমায় খোঁজা শেষ হবে না মোর
যবে আমার জনম হবে ভোর ।

চলে যাব নবজীবনলোকে,
নূতন দেখা জাগবে আমার চোখে,
নবীন হয়ে নূতন সে আলোকে
পরব তব নবমিলন-ডোর ।

তোমায় খোঁজা শেষ হবে না মোর ।

তোমার অস্ত্র নাই গো অস্ত্র নাই,
বারে বারে নূতন লীলা তাই ।

আবার তুমি জানি নে কোন্ বশে
পথের মাঝে দাঁড়াবে, নাথ, হেসে—
আমার এ হাত ধরবে কাছে এসে,

লাগবে প্রাণে নূতন ভাবের ঘোর ।

তোমায় খোঁজা শেষ হবে না মোর ।

যেন শেষ গানে মোর সব রাগিণী পুরে—
 আমার সব আনন্দ মেলে তাহার সুরে ।
 যে আনন্দে মাটির ধরা হাসে
 অধীর হয়ে তরুলতায় ঘাসে,
 যে আনন্দে ছুই পাগলের মতো
 জীবন মরণ বেড়ায় ভুবন ঘুরে—
 সেই আনন্দ মেলে তাহার সুরে ।

যে আনন্দ আসে ঝড়ের বেশে,
 ঘুমন্ত প্রাণ জাগায় অট্ট হেসে ।
 যে আনন্দ দাঁড়ায় আঁখিজলে
 ছঃখব্যথার রক্তশতদলে,
 যা আছে সব ধুলায় ফেলে দিয়ে
 যে আনন্দে বচন নাহি ফুরে—
 সেই আনন্দ মেলে তাহার সুরে ।

যখন আমায় বাঁধ' আগে পিছে
 মনে করি, আর পাব না ছাড়া ।
 যখন আমায় ফেল' তুমি নীচে
 মনে করি, আর হব না খাড়া ।
 আবার তুমি দাও যে বাঁধন খুলে,
 আবার তুমি নাও আমারে তুলে,
 চিরজীবন বাহুদোলায় তব
 এমনি করে কেবলই দাও নাড়া ।

ভয় লাগায় তন্দ্রা কর' ক্ষয়,
 ঘুম ভাঙায় তখন ভাঙ' ভয় ।
 দেখা দিয়ে ডাক দিয়ে যাও প্রাণে,
 তাহার পরে লুকাও যে কোন্‌খানে,
 মনে করি এই হারালেম বুঝি—
 কোথা হতে আবার যে দাও সাড়া

১৩৬

যতকাল তুই শিশুর মতো
রইবি বলহীন
অন্তরেরই অন্তঃপুরে
থাক্ রে ততদিন ।

অল্প ঘায়ে পড়বি ঘুরে,
অল্প দাহে মরবি পুড়ে,
অল্প গায়ে লাগলে ধুলা
করবে যে মলিন—
অন্তরেরই অন্তঃপুরে
থাক্ রে ততদিন ।

যখন তোমার শক্তি হবে
উঠবে ভরে প্রাণ,
আগুন-ভরা সুধা তাঁহার
করবি যখন পান—

বাইরে তখন যাস্ রে ছুটে,
থাকবি শুচি ধুলায় লুটে,
সকল বাঁধন অঙ্গে নিয়ে
বেড়াবি স্বাধীন—
অন্তরেরই অন্তঃপুরে
থাক্ রে ততদিন ।

১৪ শ্রাবণ ১৩১৭

আমার চিন্তা তোমায় নিত্য হবে,
 সত্য হবে—
 ওগো সত্য, আমার এমন সুদিন
 ঘটবে কবে ।
 সত্য সত্য সত্য জপি,
 সকল বুদ্ধি সত্যে সঁপি,
 সীমার বাঁধন পেরিয়ে যাব
 নিখিল ভবে—
 সত্য, তোমার পূর্ণ প্রকাশ
 দেখব কবে ।

তোমায় দূরে সরিয়ে মরি
 আপন অসত্যে ।
 কী যে কাণ্ড করি গো সেই
 ভূতের রাজত্বে ।
 আমার আমি ধুয়ে মুছে
 তোমার মধ্যে যাবে ঘুচে,
 সত্য, তোমায় সত্য হব
 বাঁচব তবে—
 তোমার মধ্যে মরণ আমার
 মরবে কবে ।

তোমায় আমার প্রভু করে রাখি,
আমার আমি সেইটুকু থাক্ বাকি ।

তোমায় আমি হেরি সকল দিশি,
সকল দিয়ে তোমার মাঝে মিশি,
তোমাতে প্রেম জোগাই দিবানিশি

ইচ্ছা আমার সেইটুকু থাক্ বাকি—
তোমায় আমার প্রভু করে রাখি ।

তোমায় আমি কোথাও নাহি ঢাকি,
কেবল আমার সেইটুকু থাক্ বাকি ।

তোমার লীলা হবে এ প্রাণ ভ'রে
এ সংসারে রেখেছ তাই ধরে,
রইব বাঁধা তোমার বাহুডোরে

বাঁধন আমার সেইটুকু থাক্ বাকি—
তোমায় আমার প্রভু করে রাখি ।

যা দিয়েছ আমার এ প্রাণ ভরি
খেদ হবে না এখন যদি মরি ।

রজনীদিন কত দুঃখে সুখে
কত-যে সুর বেজেছে এই বুকে,
কত বেশে আমার ঘরে ঢুকে

কত রূপে নিয়েছ মন হরি ।

খেদ হবে না এখন যদি মরি ॥

জানি, তোমায় নিই নি প্রাণে বরি—

পাই নি আমার সকল পূর্ণ করি ।

যা পেয়েছি ভাগ্য বলে মানি,

দিয়েছ তো তব পরশখানি,

আছ তুমি এই জানা তো জানি—

যাব ধরি সেই ভরসার তরী ।

খেদ হবে না এখন যদি মরি ॥

গুরে মাঝি, গুরে আমার
 মানবজন্মতরীর মাঝি,
 গুনতে কি পাস দূরের থেকে
 পারের বাঁশি উঠছে বাজি ।
 তরী কি তোর দিনের শেষে
 ঠেকবে এবার ঘাটে এসে ।
 সেথায় সন্ধ্যা-অন্ধকারে
 দেয় কি দেখা প্রদীপরাজি ।

যেন আমার লাগছে মনে,
 মন্দমধুর এই পবনে
 সিন্ধুপারের হাসিটি কার
 আঁধার বেয়ে আসছে আজি ।

আসার বেলায় কুসুমগুলি
 কিছু এনেছিলেম তুলি,
 যেগুলি তার নবীন আছে
 এইবেলা নে সাজিয়ে সাজি ।

আমি
মনকে, আমার কায়াকে,
একেবারে মিলিয়ে দিতে
চাই এ কালো ছায়াকে ।

ঐ আগুনে জ্বলিয়ে দিতে,
ঐ সাগরে তলিয়ে দিতে,
ঐ চরণে গলিয়ে দিতে,
দলিয়ে দিতে মায়াকে—
মনকে, আমার কায়াকে ।

যেখানে যাই সেথায় একে
আসন জুড়ে বসতে দেখে
লাজে মরি, লও গো হরি
এই স্নিবিড় ছায়াকে—
মনকে, আমার কায়াকে ।

তুমি আমার অনুভবে
কোথাও নাহি বাধা পাবে,
পূর্ণ একা দেবে দেখা
সরিয়ে দিয়ে মায়াকে--
মনকে, আমার কায়াকে ।

যাবার দিনে এই কথাটি

বলে যেন যাই—

যা দেখেছি যা পেয়েছি

তুলনা তার নাই ।

এই জ্যোতিঃসমুদ্রমাঝে

যে শতদল পদ্য রাজে

তারই মধু পান করেছি,

ধন্য আমি তাই—

যাবার দিনে এই কথাটি

জানিয়ে যেন যাই ।

বিশ্বরূপের খেলাঘরে

কতই গেলেম খেলে,

অপরূপকে দেখে গেলেম

ছুটি নয়ন মেলে ।

পরশ যাঁরে যায় না করা

সকল দেহে দিলেন ধরা ।

এইখানে শেষ করেন যদি

শেষ করে দিন তাই—

যাবার বেলা এই কথাটি

জানিয়ে যেন যাই ।

আমার নামটা দিয়ে ঢেকে রাখি যারে
 মরছে সে এই নামের কাগারে ।
 সকল ভুলে যতই দিবারাতি
 নামটারে ঐ আকাশ-পানে গাঁথি,
 ততই আমার নামের অঙ্ককারে
 হারাই আমার সত্য আপনারে ।

জড়ো করে ধূলির 'পরে ধূলি
 নামটারে মোর উচ্চ করে তুলি ।
 ছিদ্র পাছে হয় রে কোনোখানে
 চিন্ত মম বিরাম নাহি মানে,
 যতন করি যতই এ মিথ্যারে
 ততই আমি হারাই আপনারে ।

২১ শ্রাবণ ১৩১৭

নামটা যেদিন ঘুচাবে, নাথ,
 বাঁচব সেদিন মুক্ত হয়ে—
 আপন-গড়া স্বপন হতে
 তোমার মধ্যে জনম লয়ে ।

ঢেকে তোমার হাতের লেখা
 কাটি নিজের নামের রেখা,
 কতদিন আর কাটবে জীবন
 এমন ভীষণ আপদ বয়ে ।

সবার সজ্জা হরণ করে
 আপনাকে সে সাজাতে চায় ।
 সকল সুরকে ছাপিয়ে দিয়ে
 আপনাকে সে বাজাতে চায় ।

আমার এ নাম যাক-না চুকে,
 তোমারই নাম নেব মুখে,
 সবার সঙ্গে মিলব সেদিন
 বিনা নামের পরিচয়ে ।

জড়িয়ে আছে বাধা, ছাড়িয়ে যেতে চাই—

ছাড়াতে গেলে ব্যথা বাজে ।

মুক্তি চাহিবারে তোমার কাছে যাই,

চাহিতে গেলে মরি লাজে ।

জানি হে তুমি মম জীবনে শ্রেয়তম,

এমন ধন আর নাহি যে তোমা-সম,

তবু যা ভাঙাচোরা ঘরেতে আছে পোরা

ফেলিয়া দিতে পারি না যে ।

তোমারে আবরিয়া ধুলাতে ঢাকে হিয়া,

মরণ আনে রাশি রাশি—

আমি যে প্রাণ ভরি তাদের ঘৃণা করি,

তবুও তাই ভালোবাসি ।

এতই আছে বাকি, জমেছে এত ফাঁকি—

কত যে বিফলতা, কত যে ঢাকাঢাকি—

আমার ভালো তাই চাহিতে যবে যাই

ভয় যে আসে মনোমাঝে ।

১৪৬

তোমার দয়া যদি
চাহিতে নাও জানি
তবুও দয়া করে
চরণে নিয়ে টানি ।

আমি যা গড়ে তুলে
আরামে থাকি ভুলে
স্বখের উপাসনা
করি গো ফলে ফুলে—
সে ধূলা-খেলাঘরে
রেখো না ঘৃণাভরে,
জাগায়ো দয়া করে
বহিঃশেল হানি ।

সত্য মুদে আছে
দ্বিধার মাঝখানে,
তাহারে তুমি ছাড়া
ফুটাতে কে বা জানে ।
মৃত্যু ভেদ করি
অমৃত পড়ে ঝরি,
অতল দীনতার
শূন্য উঠে ভরি ।

পতনব্যথামাঝে
চেতনা আসি বাজে,
বিরোধকোলাহলে
গভীর তব বাণী ।

২২ শ্রাবণ ১৩১৭

জীবনে যত পূজা
 হল না সারা,
 জানি হে জানি, তাও
 হয় নি হারা ।

যে ফুল না ফুটিতে
 ঝরেছে ধরণীতে,
 যে নদী মরুপথে
 হারালো ধারা,
 জানি হে জানি, তাও
 হয় নি হারা ।

জীবনে আজও যাহা
 রয়েছে পিছে,
 জানি হে জানি, তাও
 হয় নি মিছে ।
 আমার অনাগত
 আমার অনাহত
 তোমার বীণাতারে
 বাজিছে তারা—
 জানি হে জানি, তাও
 হয় নি হারা ।

একটি নমস্কারে, প্রভু,
 একটি নমস্কারে
 সকল দেহ লুটিয়ে পড়ুক
 তোমার এ সংসারে ।

ঘন শ্রাবণ-মেঘের মতো
 রসের ভারে নম্র নত

একটি নমস্কারে, প্রভু,
 একটি নমস্কারে
 সমস্ত মন পড়িয়া থাক্
 তব ভবন-দ্বারে ।

নানা সুরের আকুল ধারা
 মিলিয়ে দিয়ে আত্মহারা

একটি নমস্কারে, প্রভু,
 একটি নমস্কারে
 সমস্ত গান সমাপ্ত হোক
 নীরব পারাবারে ।

হংস যেমন মানস-যাত্রী,
 তেমনি সারা দিবস-রাত্রি

একটি নমস্কারে, প্রভু,
 একটি নমস্কারে
 সমস্ত প্রাণ উড়ে চলুক
 মহামরণ-পারে ॥

জীবনে যা চিরদিন

রয়ে গেছে আভাসে,

প্রভাতের আলোকে যা

ফোটে নাই প্রকাশে,

জীবনের শেষ দানে

জীবনের শেষ গানে,

হে দেবতা, তাই আজি

দিব তব সকাশে—

প্রভাতের আলোকে যা

ফোটে নাই প্রকাশে ।

কথা তারে শেষ ক'রে

পারে নাই বাঁধিতে,

গান তারে সুর দিয়ে

পারে নাই সাধিতে ।

কী নিভূতে চুপে চুপে

মোহন নবীনরূপে

নিখিলনয়ন হতে

ঢাকা ছিল, সখা, সে—

প্রভাতের আলোকে তো

ফোটে নাই প্রকাশে ।

ভ্রমেছি তাহারে লয়ে
দেশে দেশে ফিরিয়া,
জীবনে যা ভাঙাগড়া
সবই তারে ঘিরিয়া ।
সব ভাবে সব কাজে
আমার সবার মাঝে
শয়নে স্বপনে থেকে
তবু ছিল একা সে—
প্রভাতের আলোকে তো
ফোটে নাই প্রকাশে ।

কত দিন কত লোকে
চেয়েছিল উহারে,
বৃথা ফিরে গেছে তারা
বাহিরের ছয়ারে ।
আর কেহ বুঝিবে না,
তোমা সাথে হবে চেনা
সেই আশা লয়ে ছিল
আপনারই আকাশে—
প্রভাতের আলোকে তো
ফোটে নাই প্রকাশে ।

তোমার সাথে নিত্য বিরোধ

আর সহে না—

দিনে দিনে উঠছে জমে

কতই দেনা ।

সবাই তোমায় সভার বেশে

প্রণাম করে গেল এসে,

মলিনবাসে লুকিয়ে বেড়াই—

মান রহে না ।

কী জানাব চিত্তবেদন

বোবা হয়ে গেছে যে মন,

তোমার কাছে কোনো কথাই

আর কহে না ।

ফিরায়ে না এবার তারে,

লও গো অপমানের পারে,

করো তোমার চরণতলে

চির-কেনা ।

২৫ শ্রাবণ ১৩১৭

বোলপুর

প্রেমের হাতে ধরা দেব
 তাই রয়েছি বসে ;
 অনেক দেরি হয়ে গেল,
 দোষী অনেক দোষে ।
 বিধিবিধান-বাঁধন-ডোরে
 ধরতে আসে, যাই যে সরে—
 তার লাগি যা শাস্তি নেবার
 নেব মনের তোষে ।
 প্রেমের হাতে ধরা দেব
 তাই রয়েছি বসে ।

লোকে আমায় নিন্দা করে,
 নিন্দা সে নয় মিছে—
 সকল নিন্দা মাথায় ধরে
 রব সবার নীচে ।
 শেষ হয়ে যে গেল বেলা,
 ভাঙল বেচা-কেনার মেলা—
 ডাকতে যারা এসেছিল
 ফিরল তারা রোষে ।
 প্রেমের হাতে ধরা দেব
 তাই রয়েছি বসে ।

সংসারেতে আর যাহারা
 আমায় ভালোবাসে
 তারা আমায় ধরে রাখে
 বেঁধে কঠিন পাশে ।

তোমার প্রেম যে সবার বাড়া,
 তাই তোমারই নূতন ধারা—
 বাঁধ' নাকো, লুকিয়ে থাক',
 ছেড়েই রাখ' দাসে ।

আর-সকলে, ভুলি পাছে,
 তাই রাখে না একা ।
 দিনের পরে কাটে যে দিন,
 তোমারই নেই দেখা ।

তোমায় ডাকি নাই-বা ডাকি,
 যা খুশি তাই নিয়ে থাকি,
 তোমার খুশি চেয়ে আছে
 আমার খুশির আশে ।

২৫ শ্রাবণ ১৩১৭
 ই.আই.আর. রেলপথে

প্রেমের দূতকে পাঠাবে, নাথ, কবে ।

সকল দ্বন্দ্ব ঘুচবে আমার তবে ।

আর যাহারা আসে আমার ঘরে

ভয় দেখায়ে তারা শাসন করে,

ছুরন্তু মন ছুয়ার দিয়ে থাকে—

হার মানেন না, ফিরায়ে দেয় সবে ।

সে এলে সব আগল যাবে ছুটে,

সে এলে সব বাঁধন যাবে টুটে,

ঘরে তখন রাখবে কে আর ধরে—

তার ডাকে যে সাড়া দিতেই হবে ।

আসে যখন, একলা আসে চলে,

গলায় তাহার ফুলের মালা দোলে—

সেই মালাতে বাঁধবে যখন টেনে

হৃদয় আমার নীরব হয়ে রবে ।

২৫ শ্রাবণ ১৩১৭

রেলপথে

গান গাওয়ালে আমায় তুমি
কতই ছলে যে
কত সুখের খেলায়, কত
নয়নজলে হে ।

ধরা দিয়ে দাও না ধরা,
এস কাছে, পালাও ছরা,
পরান কর' ব্যথায়-ভরা
পলে পলে হে ।

গান গাওয়ালে এমনি করে
কতই ছলে যে ।

কত তীব্র তারে তোমার
বীণা সাজাও যে,
শতছিদ্র ক'রে জীবন
বাঁশি বাজাও হে ।

তব সুরের লীলাতে মোর
জনম যদি হয়েছে ভোর
চুপ করিয়ে রাখো এবার
চরণতলে হে ।

গান গাওয়ালে চিরজীবন
কতই ছলে যে ।

মনে করি এইখানে শেষ—

কোথা বা হয় শেষ ।

আবার তোমার সভা থেকে

আসে যে আদেশ ।

নূতন গানে নূতন রাগে

নূতন ক'রে হৃদয় জাগে,

সুরের পথে কোথা যে যাই

না পাই সে উদ্দেশ ।

সন্ধ্যাবেলার সোনার আভায়

মিলিয়ে নিয়ে তান

পুরবীতে শেষ করেছি

যখন আমার গান—

নিশীথরাতের গভীর সুরে

আবার জীবন উঠে পুরে,

তখন আমার নয়নে আর

রয় না নিদ্রালেশ ।

২৫ শ্রাবণ ১৩১৭

রেলপথে

শেষের মধ্যে অশেষ আছে
 এই কথাটি মনে
 আজকে আমার গানের শেষে
 জাগছে ক্ষণে ক্ষণে ।

সুর গিয়েছে থেমে, তবু
 থামতে যেন চায় না কভু—
 নীরবতায় বাজছে বীণা
 বিনা প্রয়োজনে ।

তারে যখন আঘাত লাগে,
 বাজে যখন সুরে,
 সবার চেয়ে বড়ো যে গান
 সে রয় বহু দূরে—

সকল আলাপ গেলে থেমে
 শান্ত বীণায় আসে নেমে,
 সন্ধ্যা যেমন দিনের শেষে
 বাজে গভীর স্বনে ।

২৬ শ্রাবণ ১৩১৭
 কলিকাতা

দিবস যদি সাজ্জ হল, না যদি গাহে পাখি,
 ক্লাস্ত বায়ু না যদি আর চলে,
 এবার তবে গভীর ক'রে ফেলো গো মোরে ঢাকি
 অতি নিবিড় ঘন তিমিরতলে—
 স্বপন দিয়ে গোপনে ধীরে ধীরে
 যেমন করে ঢেকেছ ধরণীরে,
 যেমন করে ঢেকেছ তুমি মুদিয়া-পড়া আঁখি,
 ঢেকেছ তুমি রাতের শতদলে ।

পাথের যার ফুরায়ে আসে পথের মাঝখানে,
 ক্ষতির রেখা উঠেছে যার ফুটে,
 বসনভূষা মলিন হল ধূলায় অপমানে,
 শক্তি যার পড়িতে চায় টুটে—
 ঢাকিয়া দিক তাহার ক্ষতব্যথা
 করুণাঘন গভীর গোপনতা,
 ঘুচায়ে লাজ ফুটাও তারে নবীন উষা-পানে
 জুড়ায়ে তারে আধারসুধাজলে ।

গীতাঞ্জলির বর্তমান সংস্করণে অনেক গান ও কবিতার রচনাস্থান নির্দিষ্ট হইল, এবং রচনা-তারিখ ও পাঠ সংশোধিত হইল। শ্রীযুক্ত কিত্তিমোহন সেন মহাশয়ের যত্নে গীতাঞ্জলির অনেক অংশের পাণ্ডুলিপি সুরক্ষিত ছিল; তাহারই সাহায্যে এই সংস্করণকার্য সম্ভবপর হইল। শ্রীযুক্ত মোহনলাল গঙ্গোপাধ্যায় মহাশয়ের নিকট গীতাঞ্জলির অনেক গানের কবির হস্তলিখিত প্রেস্কপি রক্ষিত আছে, তাহা হইতেও সাহায্য পাওয়া গিয়াছে।

১৩৩৪ সালে প্রকাশিত সংস্করণে 'ঘাবার দিনে এই কথাটি' গানটি গীতাঞ্জলিতে প্রথম সন্নিবিষ্ট হয়। সম্প্রতি পাণ্ডুলিপি হইতে এই গানটির রচনা-তারিখ জানা গিয়াছে ও তদনুসারে বর্তমান সংস্করণে এটি কালানুক্রমে মুদ্রিত হইয়াছে।

গীতাঞ্জলির প্রথম সংস্করণে মুদ্রিত 'বাঁচান বাঁচি মারেন মরি' গানটি পরবর্তী কোনো সংস্করণে বর্জিত হয়, তদবধি এটি গীতাঞ্জলিতে আর মুদ্রিত হয় না; বর্তমান সংস্করণেও মুদ্রিত হইল না।

এই সংস্করণ প্রস্তুত করিতে শ্রীযুক্ত নির্মলচন্দ্র চট্টোপাধ্যায় শ্রীযুক্ত পুলিনবিহারী সেনকে প্রভূত সহায়তা করিয়াছেন।

২৫ বৈশাখ ১৩৪৯

শ্রীচারুচন্দ্র ভট্টাচার্য

গীতাঞ্জলি কাব্যের অন্তর্গত অধিকাংশ রচনাই গান। (সবগুলি নহে।) শেফালি, কেতকী, কাব্যগীতি প্রভৃতি বিভিন্ন গ্রন্থে এগুলির স্বরলিপি মুদ্রিত। বিশেষতঃ, পণ্ডিত ভীমরাও শাস্ত্রী-কর্তৃক দেবনাগরী অক্ষরে সংকলিত এবং ইংরেজি ১৯২৭ সালে শাস্তিনিকেতন আশ্রম হইতে প্রকাশিত এক সংগীত-গীতাঞ্জলি গ্রন্থেই গীতাঞ্জলির বহু গানের স্বরলিপি আছে।

অধুনা-প্রচলিত 'স্বরবিতান' গ্রন্থমালার কোন্ খণ্ডে গীতাঞ্জলির কোন্ গানের স্বরলিপি আছে তাহার উল্লেখ সূচীপত্রে যথাস্থানে সংকলন করা হইল।

২৫ বৈশাখ ১৩৬৩

ইংরেজি গীতাঞ্জলিতে
সংকলিত রচনার সূচী

বর্তমান গ্রন্থের পৃষ্ঠাঙ্ক	গানের প্রথম ছত্র	ইংরেজি গীতাঞ্জলির রচনা-সংখ্যা
২৪	আজি ঝড়ের রাতে	23
২২	আজি শ্রাবণঘনগহনমোহে	22
১৪৪	আমার এ গান ছেড়েছে তার	7
৮০	আমার খেলা যখন ছিল তোমার সনে	97
১৬২	আমার নামটা দিয়ে ঢেকে রাখি যারে	29
৪০	আমার মিলন লাগি তুমি	46
৩	আমি বহু বাসনায় প্রাণপণে চাই	14
৩৭	আমি হেথায় থাকি শুধু	15
১১৭	আর আমার আমি নিজের শিরে	9
৩১	আর নাই রে বেলা, নামল ছায়া	74
৩৬	এই তো তোমার প্রেম, ওগো	59
১৬৮	একটি নমস্কারে, প্রভু	103
১১৫	একলা আমি বাহির হলেম	30
১৩২	ওগো আমার এই জীবনের	91
৮৩	ওগো মৌন, না যদি কও	19
৪	কত অজানারে জানাইলে তুমি	63
২৫	কথা ছিল এক-তরীতে কেবল তুমি আমি	42
২০	কোথায় আলো, কোথায় ওরে আলো	27
১৫১	গান দিয়ে যে তোমায় খুঁজি	101
১০০	চাই গো আমি তোমারে চাই	38
৯৯	ছিন্ন করে লও হে মোরে	6
৫২	জগতে আনন্দযজ্ঞে আমার নিমন্ত্রণ	16
১৬৪	জড়িয়ে আছে বাধা, ছাড়িয়ে যেতে চাই	28
৬৯	জীবন যখন শুকায়ে যায়	39
১৬৯	জীবনে যা চিরদিন	66

৬৭	তব সিংহাসনের আসন হতে	49
১৪০	তাই তোমার আনন্দ আমার 'পর	56
৯২	তারা দিনের বেলা এসেছিল	33
২৬	তুমি কেমন করে গান কর যে, গুণী	3
৯০	তুমি যখন গান গাহিতে বল	2
১৫৭	তোমায় আমার প্রভু করে রাখি	34
১১	তোমার সোনার থালায় সাজাব আজ	83
৭৩	তোরা শুনিস নি কি শুনিস নি তার	45
১৭৮	দিবস যদি সাক্ষ হ'ল	24
১০৪	দেবতা জেনে দূরে রই দাঁড়ায়ে	77
৪২	পারবি না কি যোগ দিতে এই ছন্দে	70
১৪২	প্রভুগৃহ হতে আসিলে যেদিন	85
১৭২	প্রেমের হাতে ধরা দেব	17
১৩৭	ভজন পূজন সাধন আরাধনা	11
১৪৩	ভেবেছি মনে যা হবার তারই শেষে	37
১৩০	মরণ যেদিন দিনের শেষে	90
১৯	মেঘের 'পরে মেঘ জমেছে	18
২৮	যদি তোমার দেখা না পাই, প্রভু	79
১৬১	যাবার দিনে এই কথাটি	96
১২২	যেথায় থাকে সবার অধম	10
১৫৩	যেন শেষ গানে মোর সব রাগিণী পুরে	58
১৪৬	রাজার মতো বেশে তুমি সাজাও যে শিশুরে	8
৫৫	রূপসাগরে ডুব দিয়েছি	100
১৭৩	সংসারেতে আর যাহারা	32
৭২	সে যে পাশে এসে বসেছিল	26
১১৩	হে মোর দেবতা, ভরিয়া এ দেহ প্রাণ	65
৪৬	হেথা যে গান গাহিতে আসা	13
৩০	হেরি অহরহ তোমারি বিরহ	84

INDEX OF ENGLISH TRANSLATIONS

গীতাঙ্গল অনুবাদ

The serial number refers to the number of the poem in
the English Gitanjali. The page number refers
to the present Bengali Edition.

	PAGE
2. When thou commandest me to sing	90
3. I know not how thou singest, my master	26
6. Pluck this little flower	99
7. My song has put off her adornments	144
8. The child who is decked with prince's robes	146
9. O fool, to try to carry thyself	117
10. Here is thy footstool	122
11. Leave this chanting and singing	137
13. The song that I came to sing remains unsung	46
14. My desires are many and my cry is pitiful	3
15. I am here to sing the songs	37
16. I have had my invitation	52
17. I am only waiting for love	172
18. Clouds heap upon clouds	19
19. If thou speakest not I will fill my heart	83
22. In the deep shadows of the rainy July	22
23. Art thou abroad on this stormy night	24
24. If the day is done	178
26. He came and sat by my side	72
27. Light, oh where is the light	20
28. Obstinate are the trammels	164
29. He whom I enclose with my name is weeping	162
30. I came out alone on my way	115
32. By all means they try to hold me secure	173
33. When it was day they came into my house	92
34. Let only that little be left of me	157

37. I thought my voyage had come to its end ...
38. That I want thee, only thee
39. When the heart is hard and parched up
42. Early in the day it was whispered
45. Have you not heard his silent steps
46. I know not from what distant time
49. You came down from your throne
56. Thus it is that thy joy in me is so full
58. Let all the strains of joy mingle in my last song
59. Yes, I know, this is nothing but thy love
63. Thou hast made me known to friends whom I knew not
65. What divine drink wouldst thou have, my God
66. She who ever had remained
70. Is it beyond thee to be glad with the gladness
74. The day is no more, the shadow is upon the earth
77. I know thee as my God and stand apart
79. If it is not my portion to meet thee
83. Mother, I shall weave a chain of pearls
84. It is the pang of separation
85. When the warriors came out first
90. On the day when death will knock at thy door
91. O thou the last fulfilment of life
96. When I go from hence let this be my parting word
97. When my play was with thee I never questioned
100. I dive down into the depth of the ocean
101. Ever in my life have I sought thee
103. In one salutation to thee, my God

প্রকাশক শ্রীপুলিনবিহারী সেন
বিশ্বভারতী । ৬৩ দ্বারকানাথ ঠাকুর লেন । কলিকাতা ৭

মুদ্রক শ্রীগোপালচন্দ্র রায়
নাভানা প্রিন্টিং ওয়ার্ক্‌স্ লিঃ । ৪৭ গণেশচন্দ্র অ্যাভিনিউ । কলিকাতা ১৩

২০'১

